



---

*Branislav Gašić*  
*PUTNIKOVA PJESMA*

---

*Urednik:*  
*Vladimira Stijak Ilišić*

*Recenzent:*  
*mr Leonila Marić*

*Slika na koricama:*  
*mr Leonila Marić*

Branislav Gašić

# Putnikova pjesma

Zbirka kratkih misli, stihova i metafora..

Banjaluka, 2017.



*Vo je knjiga za koju sam sigurna da nikoga neće ostaviti ravnodušnim, bilo da se radi o „spavačima”, tek probuđenima ili onima koji su odavno zagazili putevima laviginta duše.*

Već u prvim stihovima javlja se uvodna misao koja će nas pratiti do samog kraja- načiniti prvi korak ka samom sebi, ka sopstvenim mogućnostima. Tu Branislav jasno stavlja do znanja da se od nas ne očekuje da vjerujemo njegovim izborima, već da ispitujemo sopstvene. Smisao ove knjige počiva na dopuštanju autora da se uđe u emocionalno- intelektualne svjetove kreatora bez namjere da oni ovladaju nama. Djelo ovakvog profila trebalo bi doživjeti kao strukturu usmjerenu ka budućnosti i nije ni slučajno što se ono javlja u trenutku kada smo zatrpani agresivnim i nametljivim poukama kakve nudi literatura Novog Doba. Snaga kreativne misli i sposobnost verbalizovanja iste najbolje ilustruje ni malo naivan prostor u kome se kreće Gašićev Putnik. Obavijen mističnom usamljenošću, on pjeva o isprepletenim stazama tuge i radosti, pitanjima bez odgovora, igrama

*svjetlosti i sjenke. Svaka misao, svaki stih za sobom ostavlja tragove kompleksnih slika kao odbljeske određenih trenutaka. Ohrabren idejom o postojanju, on iznova ruši i gradi svoje svjetove, što samom djelu daje notu nepredvidivosti. Biti onaj koji traga za smislom postojanja nije ni obaveza, ni privilegija, pojedinca, već stvar izbora svakog od nas. Ukoliko i poslije čitanja ove knjige niste probudili Putnika u sebi, to je samo zato što to niste ni željeli.*

*mr Leonila Marić*



*Neka svaki tvoj novi dan započne jednim korakom..  
Neka svaki korak bude samo tvoj..*







*Prešao sam kilometre zemlje  
u potrazi za istinom i željom  
zaključao sam vrata srca svog  
ostario sam sa svojom sjenom*

*Prevalio sam hiljadu mora  
ostavio vijek za sobom  
a vjetar me je pratio, brišući mi stope  
dok ne pokleknuh nad sopstvenim grobom.*





*Patnja nastaje kad se unutrašnji otpor čovjekove ličnosti lomi pod uticajem vanjskih faktora.  
Kad se otpor potpuno slomi, sve ono što u čovjeku ostane je božansko..*

*Jedna od najčešćih navika koju prosječan čovjek stekne za vrijeme svog života je da se emotivno veže za stvari koje su prolazne..*

*Kad bi svaki čovjek težio promijeniti svoju ličnost u onoj mjeri u kojoj teži promijeniti svijet, promjena svijeta bi bila spontana i neminovna..*

*Čak i dok nisi svjestan šta treba da radiš, učiš.  
Kad shvatiš da je znanje ono najvjrijednije što posjeduješ, tad si možda naučio i glavnu lekciju..*

*Egoizam - um dominira nad srcem..  
Naivnost - srce dominira nad umom..*

*Čovjek se najbolje uči u nevoljnim situacijama, u kojima se mora mijenjati da bi se prilagodio..*

*Ako u prirodi postoje dvije sile, aktivna i pasivna, jedino balans između njih može stvoriti treću, neutrališuću..*

*U većini slučajeva aktivna sila pokušava dominirati nad pasivnom. Pasivnoj sili je snaga u njenoj kreativnoj unutrašnjosti, a aktivnoj, u nesvjesnosti snage vlastite prirode kod njenog suparnika..*

*Ideje su misli koje u sebi nose izmjenu već postojećih ideja..*

*Normalna, prirodna komunikacija je moguća jedino ako postoji uravnotežena razmjena energije između sagovornika..*

*Sa jedne strane gledano, konačni odgovori ne postoje. Postoje samo konačna pitanja..*

*Jedini pravi odgovor na postavljeno pitanje je onaj koji u sebi krije novo pitanje..*

*Do koje mjere seže ljudska glupost? Uvijek do one do koje je čovjek spremjan da je prihvati..  
Možda smisao postavljanja pitanja nije u davanju odgovora, koliko u potrazi za njima..*

*Ne postoji taj mrak koji u čovjeku može ugasiti svjetlo ako ga čovjek ne ugasi sam..*

*Kad neko pokušava prenijeti misao, koja zbog ograničenosti i nesavršenosti jezika da dočara onu izvornu ideju već izlazi u iskrivljenom obliku, slušalac većinom ni ne pokušava da pronikne u srž onoga što autor pokušava da kaže. Tu istu misao on upoređuje sa obrascima koje ona u njemu budi i traži poređenje i prepoznavanje asocijacija sa onim što mu je poznato. Tako prepoznata ideja još značajnije odstupa od svoje izvorne zamisli. U takvim slučajevima, nečija tuda misao u našem daljem prenošenju uvijek nosi sa sobom i naš lični, subjektivni pečat..*

*Osnovna misao se u stalnom prenošenju boji interpretacijom onog koji je prenosi, čime se stvara iskrivljenje one primarne ideje koju ta misao u sebi sadrži..*

*Apsolutna istina vodi objektivnoj stvarnosti i oslikava se u njoj, a svi putevi koji vode do nje su relativni i izbor naše vlastite volje..*

*Pritisak čini da se neke stvari lome, a druge pucaju po šavu. Isto tako pod pritiskom od grafta nastaje dijamant..*

*Apsolutna svijest je bezgranično razumijevanje.  
Svijest i razumijevanje su uvijek bez granica. Granice  
postavlja samo čovjek..*

*Istina je jednostavna u svojoj kompleksnosti i u  
isto vrijeme nevjeroatno kompleksna u svojoj  
jednostavnosti..*

*Ništa nije potpuno crno, ni potpuno bijelo.  
Preovladavaju nijanse sive i mutnobijele..*

*Jaka koncentracija djelovanja jednog polariteta  
stvara pritisak, odnosno iskru kojom se prepoznaje  
potencijal i priroda onog drugog..*

*Polaritet koji teži jedinstvu kroz separaciju  
ne može direktno djelovati na prirodu suprotnog  
polariteta, već samo na one elemente preko kojih  
je tu separaciju moguće ostvariti..*

*U prirodi se zbog različitih naboja polariteta  
omogućava kretanje energije iz jednog pravca ka  
drugom. Isto se dešava i sa ljudskom prirodom..*

*Dobro i zlo su samo nazivi koji pokušavaju definisati  
prirodu polariteta onako kako ih doživljava većina..*

*Ako čovjek u nešto ne vjeruje,  
da li to znači da to nešto automatski ne postoji,  
ili samo da on odbija povjerovati u mogućnost  
postojanja nečega čega nije syestan?*

*Objektivna stvarnost je stvarnost u svom  
osnovnom pojavnom obliku, lišena bilo kakvog  
subjektivnog doživljaja, odnosno distorzije..*

*Bezuslovna ljubav je doživljaj koji nastaje  
u takvom stanju svijesti gdje se stvarnost percipira  
kao povezanost svih faktora koji je čine. To je  
jedinstven doživljaj svake slike, da svi njeni dijelovi,  
bez obzira koliko se činili razdvojeni potiču iz istog  
izvora i čine jednu neraskidivu cjelinu..*

*Iluzija je subjektivni doživljaj realnosti koji se  
nesvesno percipira kao konačan i jedini objektivan..*

*Realnost je zbir beskonačnih mogućnosti  
jedne beskonačne svijesti..*

*Postoji razlika između vjerovanja u Boga i življenja  
realnosti božanskog stvaranja kao neodvojivi  
fragment istovjetne svijesti..*

*Svijest : Sve što jest..  
Savjest : Kompletност..*

*Nije upitan smisao života, pravo pitanje je da li uopšte ima života bez smisla..*

*Mogućnost zbroja različitih subjektivnih doživljaja realnosti je beskonačan. Iz toga proizilazi da je i jedna od karakteristika objektivne realnosti, beskonačnost..*

*Čovjek svog neprijatelja prepoznaće kao suprotnost onoga sa čim se identifikovao..*

*Jedna od osobina objektivne realnosti je mogućnost ispoljavanja svake subjektivne unutar nje..*

*Razum povezuje sve ono što oči vide, um tumači i srce doživljava..*

.....→ .....  
Sjetna je suza u tvome oku,  
sjaj joj budi u meni jednu misao duboku.  
Težnja nam je ista, a tvoj pogled mi kaže  
da ove duše naše, svoj put do kuće  
još uvijek traže..





*Dobro i zlo su pojmovi koje stvara ljudska ličnost, nesvjesna svoje prolaznosti u pokušaju da definiše ono što smatra ispravnim i ono što smatra neispravnim. Pritom ona ne uzima u obzir konačan ishod koji ta dva faktora imaju na ono što je za razliku od nje suštinsko i neprolazno..*

*Zlo uništava samo prolazne stvari. Sve ostalo vječno postoji u svom primarnom obliku..*

*Za neograničenu svijest dostupni su svi putevi, a za onu bez razuma, vidljiv je jedino onaj koji vodi prema haosu..*

*Tendencija pravila je da stvaraju granice, dok razum ne bude spremna da ih izbriše..*

*Ljudski um je sklon mistifikaciji onih pojava i fenomena koje intuitivno prepoznaje, a za koje ne može pronaći racionalno objašnjenje..*

*Ono što većina nije spremna da prihvati dobija svoj omalovažavajući atribut sve dok ne postane dio svijesti kolektiva, u onim granicama u kojima to svijest većine dopušta..*

*Većina čini prosječnost. Kvalitet natprosječnosti u dobroj je mjeri redukovana od strane većine..*

*U ovom svijetu velike ideje uvijek ulaze na mala vrata, jer su velika zatrpana svim onim malim..*

*Jedna od osobina ograničenosti je sklonost isticanja samog sebe..*

*Kritici je sklon samo onaj ko je absolutno siguran u ispravnost onoga što tvrdi..*

*Veličina jedne ideje je onolika kolika je njena sposobnost da inspiriše pojedinca da se u određenom vremenskom periodu odvoji od uobičajenog toka misli i počne samostalno razmišljati u njenom smjeru..*

*Odlika malog čovjeka je da ismijava sve ono što nije spreman da prihvati i razumije..*

*Nikakva šteta u tome što te drugi ne razumiju. Nemoj dozvoliti sebi da budeš u poziciji da ne razumiješ samog sebe..*

*Strah od iracionalnog tjera te da potražiš sigurnost  
u onome što tvoj um smatra racionalnim..*

*Svaka promjena kreće od iste tačke, a to je za  
početak prestanak samozavaravanja..*

*Rješenje uvijek djeluje jednostavno, ali tek onda kad  
se razmrsi čitava kompleksnost datog problema..*

*Mimikrija je sposobnost nekih životinjskih vrsta da  
se izgledom i ponašanjem prilagode svojoj okolini.  
Ista pojava primjećuje se i kod ljudi, samo još uvijek  
nema svoj stručni naziv..*

*Prvi put kad se uz nemire duhovi i kad se društvo  
osjeti ugroženim prestaju da važe propisane  
moralne norme. Tad na površinu ispliva svo  
licemjerstvo lažne građanske svijesti i postane jasno  
da ona suštinska svijest, ustvari stoji na poprilično  
labavim nogama..*

*Istinu ne možeš srušiti. Možeš samo izgraditi zid  
laži oko nje koji ćeš onda zvati njenim imenom..*

*Nijedan sistem se ne može promijeniti iz korijena  
ako se poštuju sva pravila koja on propisuje..*

*Stvarano će se rušiti dok god leži na  
temeljima koji nisu vječni..*

*Boriš se da poraziš neprijatelja. Pazi da s njim ne  
umre i najbolji dio tebe..*

*Kako bi znao da je put kojim ideš ispravan ako  
nikad prije nisi koračao pogrešnom stazom..*

*Beskonačno dobro nije ono koje bezgranično daje,  
već ono koje zna kad i šta treba dati..*

*Po tome koliko energije piye od drugih vidiš  
koliko je neko udaljen od svog izvora..*

*Postoji samo jedno istinsko dobro, a to je ono koje u  
konačnici prepoznaje razliku, ali je ne pravi..*

*Sve ono u čemu se vidi nedostatak bezuslovne  
ljubavi, ili porobljava, ili je porobljeno..*

*Preko visokih bedema ništa ne može uči,  
ali isto tako ni izaći napolje..*

*Zid je dobar da te sačuva od spoljnih neprijatelja.  
Kad prestane to biti, tad postaje tvoja grobnica..*

*Kad moja maska počne služiti svojoj svrsi,  
tad ću dobro poznavati pravila igre..*

*Čim postaneš svjestan svoje maske,  
postaješ svjestan i svog lika..*

*Znam da mogu ostvariti puno više, ali iscrpljen  
sam kočeći samog sebe do iznemoglosti..*

*Staza po kojoj koračaju velike gomile ljudi za  
pojedinca je uvijek pogrešan izbor..*

*Inteligencija ne znači pamet,  
pamet ne znači razum..*

*Ono što potiskuješ u sebi, kad ga najmanje  
očekuješ ispliva na površinu..*

*U svakoj laži ogleda se načelo istine..*

*Stvarnost nikad nećeš potpuno sagledati ako je  
budeš gledao samo vlastitim očima..*

*Lažna moć kojom se čovjek hrani, hrani preko njega  
taj isti sistem koji je stvara..*

*Kakvim očima gledaš, takvim očima  
gledaju i tebe..*

*Stvarna ljepota ovog svijeta skrivena  
je ispod površine..*

*Znanje je opasno samo u rukama sebičnih namjera..*

*Ono što je nezrelo ima lijep oblik, ali dok ne  
sazri kiselog je okusa..*

*Što se oslikava u nemiru svjetom pronosi svoj  
iskriviljen odraz..*

*Čovjek uvijek malo više vidi od onoga što razumije..*



*Da ne postojim, ni tebe ne bi bilo,  
jer ti si niko i ništa bez mene  
obična svijest što beskrajem lutam  
bez oblika, mirisa, lica, bez sjene..*





*Ako ti se neka situacija čini bezizlaznom, onda tragaš za rješenjem stojeći na pogrešnom mjestu..*

*Biti na vrhu nečega ne mora značiti da u isto vrijeme nisi na dnu nečeg drugog..*

*Laž je ono što nesvjesna istina stvara u svojoj imaginaciji u pokušaju da definiše samu sebe..*

*Svi vanjski sukobi nastaju kao rezultat unutrašnjeg haosa nad kojim čovjek ne pokušava uvesti red, već ga umjesto toga projektuje na svoju okolinu..*

*Kraj svih borbi nije momenat kada poraziš neprijatelja, nego kada prepoznaš da neprijatelj uopšte ne postoji, već da si ga ti stvarao u svom neznanju..*

*Sukobi su posljedice mehaničkog prihvatanja tuđih ideja destruktivnog karaktera..*

*Neophodna laž je istina koja mudro bira svoje vrijeme kada će biti izrečena..*

*Najveća laž je ona koja ubijedi sve sudionike  
u njoj da je neophodno da je po svaku cijenu  
održavaju u životu..*

*I izrečena neistina i neizgovorena istina  
imaju istu težinu..*

*Sve ono što teži teatralnosti i predstavi ima  
sklonost da predstavlja sebe u lažnom svjetlu..*

*Istina je konstanta, jedino laži su  
podložne promjeni..*

*Prava smrt nastupa kad dozvoliš spoljnem uticaju  
da ubije ono što te čini živim iznutra. Tad postaješ  
živi leš. Najtragičniji leševi su oni koji pored svega  
toga nose još i osmijeh na licu..*

*Ko uči taj shvata, ko shvata taj zna, ko zna taj  
razumije..*

*Postojimo tek onda kad postanemo svijet  
kome težimo. Do tad samo živimo okruženi  
svijetom oko nas..*

*Postoji razlika između samoće i usamljenosti.  
Samoća je kad si sam sa sobom, a usamljenost  
kad si sam bez sebe..*

*Sam sa sobom nikad nisi sam, sa svima drugima  
samo si u društvu..*

*Sedam je isto što i tri, tri je isto što i jedan..*

*Čovjek se osjeća sigurno samo u onom  
što mu je poznato, a poznato mu je ono  
sa čim pronalazi sličnost..*

*Najbolji sagovornik je onaj sa kim gradiš priču i  
nikad ne znaš gdje će te razgovor odvesti..*

*Suština ima stvaran oblik samo u mislima, svaka  
izgovorena riječ je samo sakati..*

*Ono što je dato može biti i oduzeto, a ono što je  
stečeno može se izgubiti samo ako ga se svojom  
voljom odrekne..*

*Čula su dobre sluge, ali zli gospodari..*

*Da li vjeruješ svojim očima, ili vjeruješ samo sebi?*

*Pravila igre koju posmatraš sa strane uvijek su jasnija od pravila one igre u kojoj sam učestvuješ..*

*Ko živi sa omčom oko vrata uvijek nesvjesno traži granu preko koje će prebaciti konopac..*

*Ometajući signal dolazi izvana i djeluje na one elemente koji su mu slični, u namjeri da spriječi prodiranje onog signala koji dolazi iznutra, a pokušava da nađe svoj put da se ispolji van..*

*Sve što je do neke mjere svjesno ima potrebu da oponaša ono čemu teži..*

*I tama zna biti kreativna, ali samo u razaranju..*

*Što prestane da se kreće brzo počne i da trune..*

*Želim nekom da kažem da smo svi isti, ali ne mogu pronaći riječi da objasnim razliku..*

*I brda, i planine, i oblake, al' ništa dalje i ništa više od njih..*

*I pravi, i gradi, i vodi računa, al' ne zna gdje  
počinjem ja, ni gdje završavaš ti..*

*Sa bolom u duši, opojnim otrovom zaliva plamen,  
dok ne sagori potpuno u vatri emocija, misleći  
pritom da je u pitanju osjećaj..*

*I pročitao, i saznao, i zanio se..*

*Nije uspio zato što nije znao. Kad sazna,  
neće više ni pokušavati..*

*Ovaj svijet je za svakoga, i zdenac žednom  
i bezdan praznom..*

*Ono što mehanički djeluje kroz čovjeka  
privlači sebi sve što mu je suprotno..*

*Suština uvijek i u svemu prepoznaje samo suštinu..*

*Ponos je ono što nas lancem  
veže za zemlju. Dostojanstvo je ono čime se  
kreacija oslikava kroz nas..*

*Ono što je ponos za ličnost, dostojanstvo je za biće..*

*Kad čovjekova ličnost slomi svoj ponos, ono što se iz njega rodi naziva se dostojanstvo..*

*Ako kreacija nastaje od ideje, koja je nastala od misli, koje su, opet stvorene u umu, u čijem umu se rodila misao koja je osnov ove kreacije,a čiji rezultat smo mi i sve ono što je oko nas?*

*Ako spojimo inteligenciju i kreativnost, kao rezultat dobijamo kreaciju. Ako je ovaj naš svijet nečija kreacija, onda bi kod autora morale biti prisutne obe ove osobine..*

*Izvršenje je kreativni princip sprovodenja jedne ideje u njenu vidljivu ravan..*

*Želja je osnov i pokretač onog što se kasnije manifestuje kao namjera..*



*Šanjač sam sinoć da si mi došla  
u san naga, snježno bijele kože  
Sjedili smo dugo, jedno pored drugog  
i čutali, puštajući misli da se množe..*





*Problem je registrovanje tačke spoticanja u odnosu na izvršenje projektovane namjere..*

*Ne postoji generalno rješenje za svaki problem pojedinačno, nego pojedinačno rješavanje problema kod svakog subjekta na svoj jedinstven način..*

*Jedan fragment jedne cjeline je cijela ta cjelina u malom..*

*Jedan i jedan nisu dva, u konačnici oni uvijek daju jedan..*

*Tamo gdje je minus uvijek postoji i plus, a tamo gdje su prisutna oba, prisutno je i jedno cijelo..*

*Ne postoji utopija koja treba pružiti utočište za ljude. Utopija može nastati samo kao proizvod utočišta kojeg ljudi pronalaze unutar samih sebe..*

*Razum i bezumlje su kao sjeme, oba traže plodno tlo da niknu..*

*Istorija nas uči da kolektivne revolucije ne donose ništa novo, osim novog privida slobode..*

*Postoje dvije vrste jedinstva, individualno i kolektivno. Individualno jedinstvo je međusobna povezanost svih unutrašnjih komponenti koje čine jedno biće, a kolektivno, povezanost svih bića koja sebe doživljavaju kao komponente unutar nekog kolektiva..*

*Kolektiv koji je spreman da žrtvuje slobodu pojedinca zarad svoje sopstvene slobode, pitanje je koliko je stvarno slobodan..*

*Ko vjeruje u to da cilj opravdava sredstva, taj vjeruje i u ideal vrijedan ljudskih žrtava..*

*Um caruje tamo gdje srcu nema mjesta..*

*Ispravan ideal je samo onaj koji ostaje u formi ideje vodilje pojedinca..*

*Besmisao jedne ideje može se mjeriti sa lakoćom kojom je ona ostvariva..*

*Univerzalne ideje koje se pokušavaju izraziti riječima svoje značenje najbolje iskazuju kroz metafore..*

*Kako nam se danas čini pogrešno za juče, tako će nam se i sutra činiti pogrešno za danas..*

*Tražeći „veliku istinu” čovjek često postaje slijep za suštinu malih stvari..*

*Otpor nastaje kao posljedica straha uslijed osjećaja vlastite nemoći nad onim faktorom koji pokušava izvršiti uticaj ili promjenu..*

*Svaka promjena je posljedica prihvatanja nove ideje.  
Stagnacija je posljedica opiranja istoј..*

*Svima nam je zajednički svijet u kome živimo ali njegova realnost je samo naša vlastita..*

*Svijet je poligon u kome se kristališe suština..*

*Sunce je tu zbog tebe, i zemlja je tu zbog tebe.  
Sva priroda kao da se trudi da ti u njoj ništa ne nedostaje. Oni što vrebaju iz mraka, i oni su tu zbog tebe. Da nema tebe, ne bi imali koga plašiti.  
Kad zbrojiš šta sve na ovom svijetu postoji samo zbog tebe, još bi mogao i pomisliti da si ti neko stvarno bitan..*

*Riječi su moćne i nose onoliku snagu koliko im  
pridaješ važnosti..*

*Da li je talenat božiji dar ili jedna davno stecena,  
a zaboravljena vještina?*

*Učim, tražim se.. To sam ja. Osuđujem,  
omalovažavam i imam jako visoko mišljenje o sebi..*

*To je onaj drugi. On mi pomaže da shvatim, a ja  
sam ga pustio da vodi, jer još ne znam dovoljno da  
bih mogao sam nastaviti put..*

*Ljudi donose zaključke na osnovu onog  
što znaju jer im integritet zavisi od čvrstine njihovog  
stava. Kad bi imali predstavu koliko toga ne znaju,  
svi njihovi zaključci bi im se vjerovatno činili  
smiješnim..*

*Postoje pravila i postoje izuzeci. Kad pronađeš način  
da izbjegneš pravila, postaješ izuzetak..*

*Osuđivati je spremam samo onaj ko ne prepoznaće  
isključivost vlastitih mjerila vrijednosti..*

*U ovom svijetu nemaju svi iste  
startne pozicije, ili su ih možda imali,  
ali je progres tekao nejednak..*

*Ne mogu ih kriviti što ne znaju, kad ne znaju  
čak ni toliko da bi trebali znati..*

*Ljudi su kao noćni leptiri. Borave u mraku i  
privlače ih umjetna svjetla..*

*Mudrost je pokazatelj zrelosti i onih sa lijeve i  
onih sa desne strane ramena..*

*Svaki sistem je slobodan dok god odražava  
ono što pod pojmom slobode podrazumijeva  
njegov kolektiv..*

*Novo doba nosi novu zamjenu teza. Umjerenost  
postade izgovor glupih, a sloboda, bestidnost..*

*Ovo je pojavni svijet. Uspjeh u njemu zavisi  
isključivo od utiska koji drugi imaju o tebi..*

*Čopor bira svog vođu, a kolektiv svoju vlast..*

*Čovječanstvo liči na jedan veliki mravinjak, a prirodno je da svaki mravinjak ima i svoju maticu..*

*Teško je mijenjati onaj sistem koji je ubijedio ljude da mu je jedina alternativa anarchija..*

*Balans je univerzalan metod prilagođavanja svakoj novonastaloj situaciji..*

*Sistem pokazuje svoje pravo lice kad počne stvarati utopiju promovišući ono ponašanje za čiju je funkciju zadužen rad malog mozga..*

*Postoji određena slabost u naivnim ljudima koja ih čini metama prvog prioriteta za svoju okolinu..*

*Ne postoji sretan kraj. Sreća je relativan pojam, a beskonačnost izvjesnija od završetka..*

*Ljubav je čežnja,  
moje vječnosti dah,  
zemljino najveće zrno  
zvijezda, najsitniji prah..*



*Priroda vuka je da se hrani ovcom, naravno,  
samo dok je ovca ono što je..*

*Svaki grabljivac bira svoj pljen u skladu sa ukusom.  
Ono što mu nije jestivo to ni ne napada..*

*Što zavisi od potčinjenih, na njima i počiva..*

*Od svog straha ne vidiš strah onih koji te plaše..*

*Dugo su ih sputavali, sad ih podstiću da se igraju  
kako hoće. Prva varijanta ne donosi nikakav  
napredak, a u drugoj, velika je šansa da se krene  
u pogrešnom smjeru. U konačnici, oni dobro znaju  
da koja god od te dvije krajnosti bude na djelu,  
može ići samo njima u korist..*

*Očajan čovjek ne bira način na koji će  
popuniti svoje praznine..*

*Motiv težnje za oslobođenjem je želja za prestankom  
robovanja svakom obliku uslovljenosti..*

*Legalno nije isto što i moralno, moralno nije isto  
što i savjesno..*

*Kako će izgledati nečija borba za slobodu zavisi prvenstveno od toga šta se podrazumijeva pod pojmom „ropstvo”..*

*Politika je metodologija koja pruža mogućnost napredovanja kroz strukture sistema svih onih pojedinaca i grupa koji gaje neskrivene ambicije za dosezanje pozicija moći..*

*Nesebičan čovjek na vlasti nije vladar, nego vođa..*

*Vlasti teže upravo oni koji je ni po koju cijenu ne bi trebali imati..*

*Moć u posjedu neodgovornih ljudi je pištolj u rukama djeteta..*

*U ovom svijetu istina je relativan pojam. Postoje samo veće i manje neistine, ili laži i nepotpune istine..*

*Paranoja je nekontrolisani egzistencijalni strah izazvan nečim što bi moglo predstavljati potencijalnu prijetnju za subjekta i njegovu okolinu..*

*Treba pokušati razumjeti i ludake. Možda su ti ljudi samo svjesni nečeg čega ti nisi, a nisu se mogli nositi sa svojim saznanjem..*

*Krivity nekog zbog njegove gluposti je paradoks, jer je osuda proizvod nerazumijevanja i već kao takva sama po sebi glupost..*

*Nisam siguran da li je u ovom svijetu moguće biti potpuno budan, ali je veliki uspjeh biti svjestan sebe i svog sna..*

*Promjena je rezultat svakog progresa. Fleksibilnost ka promjeni je odlika prepoznavanja njene neophodnosti..*

*Ono u šta vjeruješ mijenja se u skladu sa okolnostima. Ono što te čini, u najtežim okolnostima se pokazuje..*

*Bez obzira na to šta govore statistike, najveći uzrok smrtnosti u svijetu je i dalje ljudska glupost..*

*Šta nam govori lucidnost u snu,  
to nam govori i san na javi..*

*Sanjanje je uslovljeno. Sanjarenje je stvar izbora..*

*Kad te parališe strah neki drugi dio tebe  
preuzme kontrolu, pa u vlastitom tijelu budeš samo  
posmatrač. Najgore je što se onda moraš crveniti  
zbog tuđih postupaka jer nikome ne možeš objasniti  
da to ustvari nisi bio ti..*

*Ovo je svijet snova, zato drži oči širom otvorene..*

*Sanjari svih zemalja, ne budite se..*

*Kažu da je živo samo ono što je stvoreno od Boga.  
Naše ličnosti nije stvorio Bog, stvorili smo ih mi  
sami..*

*Vječna se borba u meni vodi između nas nekoliko,  
ko će preuzeti kormilo i ko će koga prije sahraniti..*

*Svakog čovjeka čini ono nešto što je on sam i puno  
više nečeg drugog što niko ne zna kome pripada..*

*Nema fatalnih pogrešaka, ali jedan nepromišljen  
potez može nositi više štete nego fizička smrt..*

*Postoje dvije vrste spavača. Jedni su sanjari,  
a drugi sanjaju da su budni..*

*Cjeni me više kad ti djelujem ozbiljno,  
jer to sam ja. Prijatan osmijeh je samo znak  
da se još uvijek pretvaram..*

*Onaj dan kada me vidiš bezbrižnog i sretnog pusti  
jednu suzu za mene. To je sada neki drugi čovjek..*

*Volim svoju tugu jer me podsjeća na to da sam još  
uvijek živ u ovom svijetu veselih mrtvaca..*

*Sve ono što je na zemlji pronašlo svoj mir,  
to u njoj i počiva..*

*Kad ne budeš imao više nigdje pobjeći  
od okruženja u kome tiho veneš, znaćeš da je  
vrijeme da se vratiš kući..*

*Za onoga koji se ne ponaša u skladu sa društveno  
prihvatljivim normama kažu da je čudan..*

*Čovjek se duboko zagleda u noćno nebo tek kad mu  
postane teško da se skrasi na zemlji..*

*Biti malen znači ići sredinom najšire staze..*

*Ono što većina ljudi smatra dobrim u suštini im  
nanosi najviše zla..*

*Stagnacija je najgori oblik umiranja..*

*Svaka ideja je u svojoj osnovi jednostavna.  
Kompleksna je samo forma u kojoj se prenosi..*

*Svijet je u oku posmatrača..*

*Negacija je pokušaj zadržavanja postojećeg  
stava u svjetlu novopristiglih činjenica..*



Života silu, što teče mi kroz vene  
Energiju moju, što podizje mi strasti  
Dok crpim od onih što stoje ispod mene  
Od mene piju oni što me imaju u vlasti





*Politika je umjetnost nadmudrivanja  
u kojoj pojmovi i forme igraju ključnu ulogu kroz  
svoj najperverzniјi oblik uglađenosti..*

*Isključivost je pravilo i privilegija zatvorenih  
sistema vrijednosti..*

*Jednostavnost je odlika one manjine kod koje je  
prostodušnost glavna karakterna osobina..*

*Ako zaključci definišu formu, onda forma  
formalizuje sadržaj..*

*Linearni um zahtjeva redovnu vježbu  
da bi održao brzinu kretanja misli, a apstraktni,  
redovno pomjeranje granica prostora  
unutar kojeg se misli kreću..*

*Da bi bila shvaćena poruka koju u sebi krije  
metafora, potrebna je takva vještina uma da se u  
jednoj tački objedini i sagleda sav njen sadržaj..*

*Uspjeti inicirati kreativni impuls kod pojedinca je  
nagrada koja bi za pokretača sama po sebi  
trebala biti dovoljna..*

*Motiv da se uradi nešto može biti sebične i nesebične prirode. Zajedničko im je samo zadovoljstvo koje se javlja kao posljedica ispunjenja vlastite svrhe..*

*Svako živo biće treba određenu vrstu podsticaja da bi moglo obavljati bilo kakvu radnju..*

*Vatra donosi svjetlo, ali ostavlja za sobom trag paljevine..*

*Ono što je karakteristično za ljudi je isticanje izbora slobodne volje kada su oni u pitanju, a zanemarivanje istog kad je u pitanju neko drugi..*

*U težnji za slobodom često postaješ rob sredstava sa kojima tu slobodu pokušavaš ostvariti..*

*Ne možeš vječno uzimati, a da ti se ne uzme, niti davati, a da ti se ne da..*

*Postoji nešto što bi mogli nazvati vjerovatnoćom ostvarivih mogućnosti. Kad su vjerovatnoće male, a mogućnost ipak postane ostvariva, onda to nazivamo srećom..*

*Pobjeda je stagnacija na duge staze.  
U porazu se kali ljudski duh..*

*Šta podrazumijevaš pod pojmom „biti slobodan”  
zavisi od toga na šta misliš kad kažeš „ja”..*

*Voljno pristaješ biti rob onda kad prepoznaš  
da je to jedan od glavnih preduslova slobode..*

*Izvana sav si od svijeta, ali još ni zrna svijeta u tebi..*

*Ljudi koji žive život još uvijek nemaju težine jer  
ostavljaju tragove na pogrešnim mjestima..*

*Ima ljudi koji u sebi nose „nešto”. Ti se najbolje  
skrivaju od života..*

*Kod sebe volim sve ono što je moje, a kod drugih  
samo ono što je njihovo..*

*Ljudi pokazuju svoje iskreno lice samo kada pate..*

*Najteže je onima koji su istovremeno i praznog  
džepa i gladne duše..*

*Jedem, a umirem gladan utisaka..*

*Čula okolinu pretvaraju u utiske. Utisci  
slikaju mozaik..*

*Najljepša slika je ona koja uspijeva potpuno  
nadrasti svoje boje..*

*Ako te ono što si naučio spriječava da budeš ono što  
jesi, oduči se..*

*Iz potrebe da se izrazi, u nedostatku pravog načina,  
smisljavajući nove forme rođena je umjetnost..*

*Ne zna se šta je uzvišenje, da li ljepota,  
ili ono što je zna prepoznati..*

*Poraz u borbi sa strahom je stanje negiranja  
njegovog postojanja..*

*Koliko se neko poistovjećuje isključivo sa tijelom  
vidiš po tome koliko je spremam svaku tvoju ideju  
spustiti na zemlju..*

*U društvu čvrstih, nestalan je onaj koji je  
otvoren za svaku mogućnost..*

*U kolikoj mjeri je čovjek nesvjestan sebe, utoliko  
veću težinu nose njegovi čvrsti stavovi..*

*Svaki čovjekov napredak ima za rezultat pomjeranje  
granica u željenom smjeru..*

*I misao posjeduje svoju treću dimenziju, prostor  
po kome se kreće u svim pravcima..*

*Isključivost je osobina ljudskoguma sklonog  
linearnom razmišljanju..*

*Svijet koji posjećujem mi je stran, a svjetovi koje  
nosim u sebi su mi kuća..*

*Umijeće je povezati se na tuđu frekvenciju ne  
gubeći pritom intenzitet svoje..*

*Kad se izoluješ od vanjske buke iz tebe počne  
progovarati tišina..*

*Vjerovati ne znači živjeti vjeru, nego usvojiti tuđe  
ubjedjenje u vezi nečega i onda se ponašati u skladu  
sa pravilima koje to ubjedjenje nosi sa sobom..*

*Naivno je ući u borbu sa sistemom koristeći se samo  
sredstvima koja ti je on stavio na raspolaganje..*

*Karakteristike svega što gradi bedeme su  
strah i nesigurnost..*

*Odgovor na postavljeno pitanje treba tražiti na  
istom mjestu odakle je i pitanje došlo..*

*Prostor i vrijeme možemo posmatrati kao poligone  
koji omogućavaju kretanje svakog objekta  
istovremeno u dva različita smjera, od kojih je  
samo jedan naoko vidljiv..*

*Tragovi kretanja objekta u vremenu su vidljivi  
posmatraču u prostoru samo sa određene  
vremenske distance..*



*U snovima su i opet će mi doći  
Raširenih crnih krila u noći  
Moj nemir im je syjetionik kroz san.*





*Kretanje nekog objekta u vremenu je konstantno i ne zavisi od dinamike njegovog kretanja u prostoru..*

*Svaka naoko vidljiva pojava ima svoj,  
za oko nevidljivi uzrok..*

*Svijet oko nas je ogledalo na čijoj površini se  
reflektuje naš vlastiti odraz..*

*Tiho ubijam dječaka u sebi. On se bori, jer ne shvata  
da u ovom svijetu mora umrijeti da bih ja preživio.  
Eto kakav je svijet, eto kakvi smo mi..*

*Ako su frekvencije realnosti uvijek iste,  
zašto ih svako od nas drugačije dešifruje?*

*Tek kad si savladao prvu prepreku za njom se  
pojavila druga. Oduvijek je i bila tu, samo je nisi  
mogao uočiti jer ti je prva zaklanjala vidik..*

*Kad malo razmisliš, svako dešavanje u životu ti  
pokušava na neki način staviti ogledalo pred oči ne  
bi li te upoznalo sa svojim uzrokom..*

*Zamisli svoj život kao beskrajnu filmsku priču čiju premijeru posmatra čitav svjesni univerzum..*

*Ako svijet dijelimo na objekte koje posjedujemo i objekte koje posjeduje neko drugi, tada osjećaj tuđeg vlasništva nad nama obično prođe nezapaženo..*

*Dan kada stvarno odem je dan mog povratka kući..*

*Što je maleno, postaje još manje  
kad ga ponesu velika slova..*

*Put psa vodi do čovjeka, samo što pas ne zna  
ništa o tome, a ne zna ni čovjek..*

*Opasnost za čovjeka koji formira sliku stvarnosti samo na osnovu vanjskih utisaka je, što mu neko tu sliku može predstavljati kako misli da bi je ovaj trebao vidjeti, a on nema sa čim da je uporedi, da bi utvrdio njenu ispravnost..*

*U svakoj ideji bi uočili primisao beskonačnosti, samo kad je ne bi posmatrali ograničeni formom našeg sistema vrijednosti..*

*Krajnje zlo je ambicija da se vlada sam..*

*Motiv slobode za cijelo čovječanstvo može biti ispravan,a rezultat sličan kao kad se gomila djece prepusti kontroli svoje vlastite samovolje..*

*Na putu do cilja postoje dvije staze.Jedna koja zahtjeva da se eliminišu sve tačke spoticanja, i druga koja traži način kako da se one zaobidu..*

*Sve ono tvoje što nisi u stanju da kontrolišeš ti, kontroliše neko drugi umjesto tebe..*

*Svi smo mi glavni likovi naše filmske priče. Onaj ko upozna scenario, ima šanse da postane i režiser..*

*Crv u našim očima izgleda sićušno, ali ta veličina ne govori ništa o važnosti njegove karike unutar čitavog lanca..*

*Slučajnosti postoje samo u svijetu koji ne posjeduje svijest o uzročnosti..*

*Slobodnom voljom pojedinca upravljuju drugi faktori, sve dok on sam ne postane svjestan mogućnosti njenog izbora..*

*Iz što smo više uglova spremni posmatrati određeni predmet znatiželje, to je naša slika o njemu potpunija..*

*Onoliko koliko si stvarno napredovao u životu je onoliko koliko si daleko dospio vraćajući se unazad..*

*Postoji razlika između prirodnog ponašanja i onog koje se oponaša..*

*Kultura i fini maniri ne kupuju kartu za raj..*

*Onaj što se ponosi titulama i svojim materijalnim stanjem iz ugla univerzuma nalikuje na crva..*

*Sve što stvara robovski mentalitet, ma koliko se činilo uzvišenim ne potiče od strane koja razmišlja o tvojoj dobrobiti..*

*Kada postaneš svjestan neke činjenice teško se poslije pretvarati da ona ne postoji..*

*Najveći čovjekov poraz je kad ga učine zavisnim od lažnog svjetla, pa zasljepljen ne vidi plamen onog stvarnog kojeg nosi unutar sebe..*

*Metafora je jezička slika koja vrijedi hiljadu riječi..*

*Inicijator prelaska na novi obrazac je impuls koji se javlja uslijed zasićenosti kontinuiranim ponavljanjem starog..*

*Faktor promjene je onaj koji donosi novi uvid na već postojeću mogućnost..*

*Realnost svijeta se opaža čulima, osjeća duhom, a definiše ljudskom svješću..*

*Prije nego što dočekaš božji znak na nebu, provjeri da se slučajno nisi zaglibio u blatu u njegovoj bašti..*

*Čovjekovo nesvjesno je jedina teritorija gdje je zlu dopušteno da djeluje..*

*Sve ono što ljudi ne žele da znaju, iskoristiće na njihovu štetu neko ko zna..*

*Marketing je kampanja koja ima za cilj predstaviti uljepšanu sliku nekog proizvoda isticanjem njegovih isključivo pozitivnih osobina..*

*Pitanje je da li bi bilo moguće manipulisati ljudima  
da oni sami nisu spremni povjerovati u laž..*

*Ovaj društveni sistem nikad ne bi mogao  
funkcionisati da nije baziran  
na nekom vidu prevare..*

*Kad podobnost zamijeni sposobnost,  
jasno je šta su prioriteti..*

*Naša predstava o nama samima je često onakva  
kakvu bi u konačnici željeli da vidimo..*

*Kritika je ukazivanje na neispravnost ili manjkavost  
pojava iz okoline, koja se kao takva ne mogu uklopiti  
u naša vlastita mjerila vrijednosti..*

*Svaki kritički stav potiče od nemogućnosti  
poistovjećivanja sa nečim drugačijim od onoga kako  
smo identifikovali sami sebe..*

*Stav koji je zasnovan na ličnoj nepogrešivosti  
odgovornost za svoje postupke traži u drugima..*



*Ako želiš da gradis, prijatelju moj  
Židaj na onom mjestu što ti je u duši  
Jer sve što ne sagradis na vječnom tlu  
Vrijeme mu dođe da ga nagrize i sruši..*





*Varijacije su bezbrojne, ali princip je uglavnom isti. Ono što je u čovjeku nesvesno i mehaničko, privući će sebi suprotnost koja će ga nadopuniti, a ono što je svjesno, privlačiće sve čemu teži i što ga ispunjava..*

*Svaki niži ili viši centar koji dominira u biću, prepoznaje slične vibracije iz svoje okoline i biva im privučen..*

*Viši centri bića su aktivni kad niže emocije prerastu u suptilna čula, a zaključci izgube svoju kritičku notu..*

*Seks je čin fizičkog razmnožavanja, vođen zadovoljenjem animalnih nagona muškog i ženskog pola. Za razliku od njega, vođenje ljubavi bi bilo nešto kao sjedinjavanje muškog i ženskog polariteta putem fizičkih tijela u jednu zanosnu cjelinu. Oba čina su po funkciji ista, razlika je jedino u centru iz koga potiče motiv za izvršenjem..*

*U ovoj eri tehnološkog napretka civilizacije napreduje jedino tehnologija, dok ljudi uglavnom postaju civilizacijski razmaženi idioti..*

*Život stagnira kad utjehu potražiš u prosječnosti..*

*Lako će ti se potčiniti, samo me uplaši dovoljno jako..*

*Samo čovjek koji je izabrao slijepu vjeru umjesto razuma može povjerovati da će Bog doći da ga spasi od njegove vlastite gluposti..*

*Individualna svijest je to što daje smisao svemu.  
Riječi se mogu posmatrati kao žive poruke ili kao kombinacije mrtvih slova..*

*Šta je drugo život nego san koji sanjaš sam,  
na istom mjestu gdje i svi drugi sanjaju svoje živote..*

*Dok posmatram druge kroz njihove životne priče,  
imam utisak da mi je scenario njihovog života jasniji  
nego što je njima samima..*

*Ako u nekom prepoznam samo iskru života,  
ta iskra u meni pali novi plamen..*

*Kad me riječi iznevjere, naučiću da slikam. Kad me iznevjere ruke, pričaću ti pogledom..  
Opet sam zaspao sanjajući da se budim..*

*Stvarna demokratija je ideja utopije koja nikad u praksi nije sprovedena u djelo..*

*Vladati se može na tri načina. Razumom, kontrolom informacija, i represijom. Najčešći oblik vladavine je kombinacija zadnje dvije metode..*

*Demokratija je politički sistem upravljanja, koji pod krinkom svog imena omogućava uspješno održavanje autokrata na vlasti..*

*Ulavismo se u blatu čekajući da stigne mesija..*

*Najprirodnija stvar je čovjekova težnja za slobodom. U jednom momentu mora doći do razdvajanja onih koji prelaze preko granica zacrtanih kompromisima kolektiviteta i onih koji ostaju unutar njih..*

*Probleme koje bi riješila zdrava logika, pravila i procedure učine još većim..*

*Ko u sebi nosi haos, prenosi ga i na svoje okruženje.  
U tom haosu onda uspostavlja svoj red..  
Promjena koja se desi preko noći, promjena je kratkog daha..*

*Stvarnost čini spoj onog svijeta kojeg vidiš, sa onim svijetom kog nosiš u sebi..*

*Nema te krvи koja može ugasiti žed predatorske prirode..*

*Kad pojedincem zavlada egzistencijalni strah,  
onda u njemu instinkt za preživljavanje postaje  
dominantniji od svijesti..*

*Tjeram se na tugu, ali moje oči više ne žale nikoga.  
Zašto je to tako?*

*Čim dosegneš vrh stjene prkosa, vidjet ćeš sa njega i  
jezero svoje slobode..*

*Kad dođe vrijeme da ustaneš iz groba i skineš  
prašinu sa lica, neće te moći gledati u oči oni koji  
sebe danas smatraju živim..*

*Nekad sam hodao uspravno. Tad sam još bio čovjek.  
Sad se krećem tamo gdje ne postoji oblici,  
a ovaj čovjek još uvijek hoda za mene..  
Dok je čovjeka postoji i nemir..*

*Sposobnost za kritičko razmišljanje je prvi korak na  
putu ka razumu..*

*Preduslov za uspjehan razvoj bića je adekvatno  
razvijena ličnost..*

*Sve što ima oblik ima i svoju sjenku..*

*Prvi znak prepoznavanja samosvijesti kod nekog pojedinca je njegova izražena individualnost..*

*Društveno prihvatljivo ponašanje između muškog i ženskog pola je ljudska interpretacija životinjskih rituala parenja..*

*Prava snaga se mjeri u onoj sferi u kojoj se uspješno odolijeva pritisku..*

*Kad sam svoj, tad me ne razumiju,  
kada nisam, onda me se boje..*

*Zamjeram sebi to što još ponekad  
znam zamjeriti drugima..*

*Na moje pitanje odgovori mi sa tajnom i biću ti vječno zahvalan..*

*Što se veliča kao dobro u materiji, suprotstavljen  
je dobru u onom što bi mogli nazvati njenom suprotnošću..*

*Gospodar koji ne hrani svoju zvijer, vremenom postaje i rob i žrtva njene gladi..*

*Svaka pretpostavka za koju ima osnova, a koja ostavlja otvoren prostor nagađanju, puno je bliža istini od bilo kojeg zaključka utemeljenog na čvrstim dokazima..*

*Ljudima se ideal slobode svodi na zadovoljenje njihovih najnižih pobuda. Na njih ih tjeraju nagoni vlastite životinjske prirode. Pri tom oni ne žele snositi nikakvu odgovornost zbog eventualnih posljedica koje takve radnje mogu imati po druge osobe. U ovom društvu, novac im pomaže ostvariti to što oni nazivaju slobodom..*

*Odreci se svake uslovljenosti i bićeš slobodan čovjek..*

*Ako je boja pokazatelj vibracije, šta nam to govori crna boja i zašto ona sebi privlači više svjetlosti od svih ostalih?*

*Za sanjive oči horizont ne predstavlja granicu vidnog polja..*



*Zivot, to je put ka sreću  
Nesretan i sretan, oba će ti reći..*





*Kad sam saživim svoje ideje i one postanu dio mene,  
nestaće i potrebe za njihovim iznošenjem. Naučiću  
se neophodnosti tištine. Samo na pitanje, odgovorit  
ću sa onim što mislim da je potrebno reći..*

*Društvena mjerila vrijednosti su ovozemaljska  
refleksija u ogledalu stvarnih nivoa zrelosti bića..*

*Ako si se patio čitav život, zbog čega se onda bojiš  
smrti? Pa u zemlju ćeš sahraniti samo gorčinu i  
muku..*

*Slika Boga kako ga čovjek doživljava je jednako  
srazmjerna njegovom stanju svijesti..*

*Daje se ono što se raspoređuje, a daruje ono čega  
nikad neće nestati..*

*Mišljenje nije ništa drugo nego naš stav o nečemu,  
formiran na osnovu onih činjenica sa kojima smo  
upoznati i pretpostavki vezanih za sve ono što ne  
znamo..*

*Znak potpunog saživljenja materije je težnja  
usmjerena ka njenom opozitu..*

*Bez obzira na to šta mi mislili da znamo o univerzumu, univerzum i dalje funkcioniše po principu koji je samo njemu znan..*

*Ono što nas motiviše da se krećemo u određenom smjeru potiče od želje za zadovoljenjem vlastitih potreba..*

*Kolektiv ima običaj prilagođavati sebi sve one individue koje iz bilo kog razloga nisu u mogućnosti pružiti mu otpor..*

*Svjetom se širi miris truleži od mrtvila onih živih..*

*Riječi su mrtve čim se izgovore. Živo je samo ono što su uspjele probuditi kod onog koji sluša..*

*Logičan odgovor će zadovoljiti sva pitanja koja su potekla iz uma. Ona koja potiču iz suštine, ostaju vječna pitanja ovog svijeta na koja svaka jedinka mora potražiti svoj vlastiti odgovor..*

*Prava snaga ne izvire iz onog koji pokorava, već iz onog koji zna kako ostati nepokoren..*

*Materija je jedna stepenica vječnog..*

*Dokaz bezuslovne ljubavi je dar slobodne volje na djelu..*

*Ljudi kažu da Bog sve oprašta. Mislim da to nije tačno. U stvarnosti Bog ne oprašta nikad, zato što nije sposoban ni zamjerati..*

*Sistem je igra u kojoj se mnogi trude dospjeti u poziciju iz koje će joj moći diktirati pravila..*

*Rješenje će biti moguće, a izlaz sasvim blizu, ako svakoj svojoj misli naučiš podariti krila..*

*Najveća blagodat ovog svijeta je glas savjesti. On sa sobom nosi i najteže breme koje čovjeka može moriti, a to je osjećaj krivice..*

*Kralj bez podanika nikad ne bi bio kralj..*

*Kovanica je dobar primjer dualnosti. I lice i naličje čine isti novčić..*

*Filozofija je najuzvišeniji oblik umjetnosti, a metafizika, njena najzrelija faza..*

*Kome je srce pronašlo put do beskonačnog izvora,  
u očima ima sjaj..*

*Lako ćeš prepoznati onu koja više nije žena.  
Ta sebe nikad neće gledati očima drugih..*

*Dok žive kao polovi, različiti su. Kad postanu  
polarnosti, onda su isti, a mogu biti i različiti..*

*Smisao se ne ogleda u pojavama, već u njihovom  
tumačenju..*

*Pravila određuju oni čiji interes zavisi od njihove  
primjene..*

*Okrećeš se u istom krugu u kome su se okretali  
svi oni prije tebe. Naučili su te kako da uspješno  
slijediš putanju da bi nastavio tradiciju neprestanog  
kretanja. Ti slijediš tu tradiciju jer znaš da onaj  
koji je napusti nije cijenjen od ljudi koji čine krug.  
Poželjećeš da izadeš iz njega tek kad čitavim svojim  
bićem budeš prepoznao besmislenost njegovog  
mehaničkog održavanja..*

*Ne znači mu ništa to što hoda na dvije noge, kad se nalazi u istom položaju kao i ono što hoda na četiri..*

*Prva ljudska emocija je strah. Čovjek se plaši samo onog što ne poznaje. Rješenje nije u suočavanju sa strahom, već u dobrom poznавању onog što ga izaziva..*

*Proces individualizacije započinje kada pojedinac zamjeni opšteprihvaćena društvena načela stavovima do kojih je došao vlastitim rasuđivanjem..*

*Posmatrajući kako se ponašaju i na šta su usmjereni, mislim da im nije puno stalo do toga u šta ćeš vjerovati. Važno je samo da to bude nešto izvana, nekakva apstrakcija iz spoljnog svijeta koja ima svoje ime, svoj opis, svoju predstavu. Oni jako dobro znaju šta rade, a rade to tako dobro da su gotovo i neprimjetni. Pitanje je možemo li mi za sebe reći da dobro radimo onaj posao koji je na nama, ako sve što uradimo prvenstveno ide njima u korist..*

*Slikar svoje riječi pretače u slike, a pjesnik svoju čežnju u stihove..*

*Đavoli već vjekovima žive na račun ljudi koje vodi  
slijepa vjera u Boga..*

*Da li je u vazduhu ili na zemlji, prepoznaćeš kad  
vidiš šta mu je sveto..*

*Visoko se uspinje onaj učen na vlastitim padovima..*

*Razumijevanje je svijest o relativnosti  
svakog pojma..*

*Tuga je prvi osjećaj koji se javlja buđenjem iz  
zanosa lažne ispunjenosti..*

*Ispravno postaje pogrešno čim se generalizuje..*

*Koliko postupak ima smisla pokazuje rezultat  
njegove radnje..*

*Davati znači inspirisati..*



*Molim te, ne ponavljaj moju grešku  
da i ti ne bi pogrešan bio  
Ne zamjeraj mi više neprijatelju moj  
jer i ja sam sebi odavno oprostio..*





*Koliko je neko okrenut sam sebi, vidiš po tome  
što će biti spremam učiniti nešto za drugog,  
samo ako od toga bude mogao imati vlastite koristi..*

*Pojavna stvarnost je kao slikarevo djelo. To kakvu  
nam ta slika poruku nosi, može prepoznati samo  
umjetnik u nama..*

*Vrh sistema čine pojedinci koji okreću glavu od  
stvari u kojima nemaju ličnih interesa..*

*Pravi sanjari gledaju svijet širom otvorenih očiju..*

*Osjećaj neprilagođenosti u današnjem svijetu nije  
psihološki poremećaj koji treba liječiti, već normalna  
reakcija odbojnosti prema nečemu što je odavno  
napustilo svoj prirodni tok. Upravo suprotan osjećaj  
prema takvim neprirodnim vrijednostima bio bi  
znak da sa nama nešto ozbiljno nije u redu..*

*Jedan od razloga za depresiju može biti  
nemogućnost prihvatanja spoljnog svijeta  
onakovog kakav jeste, u odnosu na onakov kakav  
mislimo da bi trebao biti..*

*Želje boje realnost našim očekivanjima..*

*Kad bi željeli da nešto dobro upoznamo morali bi početi razmišljati poput njega..*

*Sve oko nas je kao otvorena knjiga. Što je bolje naučimo čitati, to će manje biti tajni..*

*Unutrašnji osjećaj te nikad neće prevariti, mogu te prevariti samo njegova tumačenja..*

*Kad dovedeš u pitanje sve što si naučio, tek tad naučiš vjerovati sam sebi..*

*Važno je prepoznati koliko si malen u ovom svemiru, a shvatiti koliko si ustvari bitan..*

*Biti u vječnosti znači prestati se kretati u prostoru vremena i postati njegov svjesni dio..*

*Beskonačnost je neograničenost prostora, a vječnost je beskonačnost vremena..*

*Usred velikih očekivanja nemoguće je realno procijeniti nečiju vrijednost..*

*Jedan doživljaj je da vrijeme prolazi, a drugi je doživljaj da se mi krećemo unutar prostora kog nazivamo vremenom..*

*Izreku „Mislim, dakle postojim” trebalo bi dopuniti sa „Razumijem, dakle vječan sam”..*

*Iz ugla religije svi „grešnici” će završiti u paklu, a „pravedni” u raju. Sreća je samo to što se religija sigurno neće pitati za mišljenje kad na djelu budu stvarna mjerena zrelosti suštine..*

*Može li postojati drugačiji Bog osim onog koji bi obuhvatao i činio sve ono što postoji?*

*Riječi su kao vjetar čiju jačinu određuje veličina ideje koju one pronose sa sobom..*

*Razum zahtjeva napor koji svoju snagu crpi iz onog što je izvan čovjeka..*

*Lakše je izabrati vjerovati u nešto, nego to nešto pokušati razumjeti..*

*Bog koji od ljudi traži obožavanje i poslušnost, ne može u isto vrijeme biti i stvaratelj njihove esencije..*

*Odnos Boga koji nagrađuje i kažnjava,  
i čovjeka koji u njega vjeruje, je jednak odnosu  
gospodara i njegovog roba..*

*Ima nekih nelogičnosti u ljudskom  
tumačenju Boga. Po njima on istovremeno i voli,  
i mrzi, i ravnodušan je..*

*Sažaljenje je niži oblik empatije koji nastaje  
emotivnim uživljavanjem u nevoljnu situaciju  
jednog pojedinca ili kolektiva, a za čiji uzrok se  
smatra ono što društvo naziva „tragična sudbina”..*

*Empatija je sposobnost saosjećanja, odnosno  
šireg razumijevanja razloga zbog kojih je došlo do  
određene nevoljne situacije u kojoj se našao neki  
pojedinac ili kolektiv..*

*Onaj što živi život osjeća se sretnim. Onaj što muči  
muku uči se pravom osjećaju ispunjenja..*

*Ono što sada djeluje kao trnje na stazi,  
na kraju puta liči na latice ruža..*

*Jedino iz ugla univerzuma konačni cilj  
opravdava sva sredstva..*

*Đavoli su tu da rade božanske poslove za  
koje anđeli ne mogu prljati ruke..*

*Ono što te plaši, to te i kontroliše..*

*Sistem kontrole čovječanstva zasniva se na  
čovjekovom strahu od umiranja..*

*Ono što se danas naziva moralnim ponašanjem  
ima svoj korijen u religiji, i to u onom što bi mogli  
nazvati strahom od grijeha..*

*Istinski moral je ekvivalent savjesti pojedinca, a ne  
pravilima definisan model društvenog ponašanja..*

*To što bi trebala biti vrlina, u ovom svijetu se  
najčešće tumači kao slabost..*

*Istina je relativna, zato što u sebi objedinjuje obe krajnosti..*

*Na dobrom si putu da riješiš problem, ako si u stanju prepoznati problem u svakom rješenju..*

*Živiš li, ili samo oponašaš druge koji misle da žive?*

*Nisu pogrešni dok god pitaju, pogrešni su tek kad donesu zaključke..*

*Životu daješ smisao, dok motiv „biti živ“ ne postane tvoj jedini smisao u životu..*

*Sva dinamika života polazi od individualne potrage za srećom..*

*Onaj ko u sebi gazi ponore, dobro zna šta znači u sebi popeti se na planinu..*

*Ako nekog stvarno voliš, pusti ga da bude slobodan..*

*Treba mi nešto da se slomim  
da se kidam  
da se kajem*

*Da bih živ stao na noge  
koracao dalje  
da ne zastajem..*



*Moja je krivica za ono što od mene postaje uzrok,  
a samo tvoja odgovornost za ono što  
od njega postaje tvoje..*

*Najteže bitke se vode sa onim što većina  
ljudi uopšte ne primjećuje da postoji..*

*Problem laži je što sama nikad ne  
prihvata istinu o sebi..*

*Jasno mi je zašto se ljudi ne podnose. Jedna ljudska  
sujeta teško može razumjeti drugu..*

*Dok sam ne prepoznaš laž, nikad se nećeš ni  
zapitati šta je istina..*

*Ti što živiš, da li bi dao život da možeš biti  
živ za života?..*

*Ako mi posudiš jednu misao za sliku, rado ću ti  
vratiti jednu riječ za djelo..*

*Ono što smatraš vrijednim, vrednuje upravo tebe..*

*Kad pamet izda, srce će ti reći da nema ispravnijeg puta u životu od traženja onog za čime čezneš..*

*Nisam prisutan, ne da ne budem, nisam tu, baš zato što me ima..*

*Mudrost je pred vukom ne ispasti ovca, a snaga, pred mišem ne biti zmija..*

*Biti kralj, ima želju samo prosjak u duši..*

*Na ovom svijetu sve savršeno funkcioniše u svojoj mehanici. Problem nastaje kad se javi iskra koja počinje prepoznavati obrazce ponavljanja. Tad se neminovno javlja otpor mehanizmu i nastaje problem koji može riješiti jedino pojedinac, svojom voljom i na svoju vlastitu korist..*

*Ono što misle da znaju, uglavnom ne znaju, a ono što znaju, toga često nisu ni svjesni..*

*Ko ponosno hoda svijetom, taj je kao lav. Koga lav gleda kao miša, taj se kreće kao div među ljudima..*

*Egoizam se radja iz sljepoće koja umišlja  
da je svevideća..*

*Religija je staza nedozrele suštine..*

*I ono što leži pod suncem i ono što boravi u mraku,  
stvoreno je od svjetla..*

*Smisao ne traži nevino dijete, već mudar starac..*

*Put srca mimo uma vodi do čiste,  
ali bespomoćne duše. Savršena žrtva. Put  
uma mimo srca vodi do hladne i proračunate  
inteligencije. Savršen predator..*

*Iz pozicije sa koje posmatramo, zahvaljujući oku u  
stanju smo da određeni predmet vidimo iz jednog  
ugla. Zahvaljujući umu u stanju smo da ga sa iste  
pozicije sagledamo iz svih uglova odjednom. Za ovo  
drugo nisu nam potrebna čula. Šta nam to govori?*

*Čula su instrumenti svijesti, a svijest, unutrašnji  
vid koji definiše realnost..*

*Možda viši svijet ne stoji mimo postojećeg. Možda je ovaj svijet koji vidimo samo projekcija višeg svijeta, jedini koga naša čula uspijevaju dešifrovati..*

*Takav sam kakvog me vidiš i onakav kako me vide drugi. Pored toga, najviše sam onakav kakav još nisam viđen..*

*I dobri i loši ljudi imaju jednu zajedničku osobinu, a to je da svi rade samo ono što misle da je ispravno..*

*Razum je balans..*

*Teško je sebe vidjeti u pravom svjetlu. Puno je lakše vidjeti kako te ljudi doživljavaju, pa iz toga pokušati izvući što objektivniji zaključak..*

*Sve vezano za život je misterija prepuna čuda. Kad se stvari počnu uzimati zdravo za gotovo, tad čuda nestaju, pretvarajući se u nešto što se već od starta podrazumijeva da postoji..*

*Od izvora čovjeka, postoje dva puta njegovog mogućeg razvoja. U konačnici, jedan vodi nečovjeku, a drugi, natčovjeku..*

*Ako si isti, prepoznaćeš me. Drugačiji sam kad plivam u mutnoj vodi,a opet drugačiji kad sam u visokom letu..*

*Istina se rijetko oprašta jer je gorka, a u lijepom sjčećanju ostaje svaka preslatka laž..*

*Najveći domet miša je dostizanje pozicije lava.  
Da mu je odredište prebivalište ptice, već u startu ne bi bio malen..*

*Budi tih među prizemljenima, jer ti mrze sve što je drugačije od njih..*

*Ljudi su u stanju sve oprostiti, ali nikad tuđi pokušaj leta..*

*Savršen svijet za svakog pojedinca je svijet prilagođen njegovim vlastitim željama..*

*Kad se realnost prilagođava duhu želje,  
tad od stvarnosti ostane jedino pojam u rječniku..*

*Do velike promjene se dolazi koračajući sitnim koracima..*

*Postani otvoren za mogućnost i neće ti  
više trebati dokazi..*

*Religija podrazumijeva sljepo vjerovanje u crkvene  
dogme, odnosno nedovođenje u pitanje ispravnosti  
načela vjere jer se njena osnova temelji na  
viševjekovnoj tradiciji..*

*Svijet oko tebe je prevelik da bi ga čitavog sagledao  
malim očima..*

*Onaj ko nema, uči se da stekne ono što je  
najvrjednije, a onaj što ima, u prilici je da nikad ne  
dobije takvu šansu..*

*Siromašan čovjek nije svjestan blagodati  
svog položaja..*

*Ni gladni ne razumiju site, isto kao što ni siti  
ne razumiju gladne..*

*Glupost je uvijek prepuna sebe..*

*Samopouzdanje je subjektivan osjećaj sigurnosti u  
ispravnost vlastitih postupaka i stavova..*



*Prepoznaćeš me i postaću ti drag  
Ako bliskost srca troje srce traži  
U njemu razum i vrlina od laži srca draži..*





*Dokazi ne predstavljaju potvrdu, već tragove..*

*Apstraktno podrazumjeva nelinearno..*

*Misao garantuje postojanost forme.  
Forma definiše oblik..*

*Ono što postoji, postoji i bez naučnih  
dokaza o njegovom postojanju..*

*Stagniranje je kretanje ukrug..*

*Kretanje je konstantno i nije stvar izbora.  
Njegov smjer jeste..*

*Registrirati i definisati neku pojavu je  
jedna stvar. Pretpostaviti šta je uzrokuje i šta  
joj je cilj je nešto sasvim drugo..*

*Ako se želiš držati samo dokazivih činjenica,  
drži se nauke..*

*Što više posjeduješ, to manje stičeš..*

*Tvoji pokreti ne kriju čežnje koje sakriva tvoj lik..*

*Oči često govore ono što glava misli,  
a usne ne žele da kažu..*

*Iza svakog razočarenja krije se očekivanje. Iza svega  
očekivanog krije se podsvjesna težnja..*

*Bunt je spoljna reakcija nesputanog duha..*

*Prva faza je ona u kojoj se prepozna i pravi  
razlika. Nju obično karakteriše kritički stav prema  
svemu što je drugaćije. Druga faza je djelomično  
razumijevanje neophodnosti postojanja razlika.*

*Nju u početku karakterišu uzdržanost i  
tolerantnost, a zatim prihvatanje. Treća faza je  
prepoznavanje sličnosti u odnosu na različite  
manifestacije, onog suštinski istog. Ona u konačnici  
vodi jedinstvu i bliskosti..*

*Kad se neko iz znatiželje otisne predaleko, strah  
od nepoznatog zna ga trajno ukopati na sigurnu  
početnu poziciju..*

*Lav je kralj životinja, ali može samo zavidjeti orlu na  
visini njegovog položaja..*

*Linearni um se divi brzini logičkog odaziva na input koji dobija putem čula. On to naziva inteligencijom. Veća inteligencija bi onda značila samo veću brzinu kretanja, ali i dalje u istom pravcu i po istoj liniji..*

*Daj im svega da ne budu željni ničega, i dao si im priliku da izgube i ono malo što imaju..*

*Uzalud je pričati očima što ne vide i pokazivati ušima što nisu čule..*

*Kad zvijer stane buditi zvijeri, od tragova ljudskih ne ostane ni traga..*

*Svima je život uzeo nešto što nije bilo njihovo, a ono njihovo što je nestalo, izgubili su sami..*

*Nekada su staze ispred nas toliko isprepletene, da ništa osim srca ne prepoznaje pravi put..*

*Čeznuti zna samo polovina koja traži drugu da bi postala cijela..*

*Sanjati znači vjerovati, težiti znači sanjariti..*

*Jesmo li stvarno sretni na ovom svijetu, gdje nam se  
čitav život svodi na to da sanjamo o sreći?*

*Nekad ono nerečeno ostavi takav trag da počne  
pričati kroz tebe samo jezikom bola..*

*Jedini jezik kome pripadaju sve forme suštine je  
jezik univerzuma..*

*Još se izražavam riječima. Kad pređem na djela, tad  
ću govoriti pomoću njih..*

*Poricanje je jako moćna stvar. Gotovo savršen  
mehanizam odbrane ličnosti koja se temelji  
na određenom uvjerenju. Najekstremniji oblik  
poricanja se javlja kod onih ličnosti gdje udari istine  
prijete uzdrmati nosive stubove na kojima počiva  
njihov integritet..*

*Koja je razlika između političara, popa, gurua i  
pastira? Jedino riječ guru ne počinje sa slovom p..*

*Ako se budeš redovno molio i čitav život bježao  
od zla, možda dobiješ šansu da te prime u raj kao  
izbjeglicu..*

*lako smo na vrhu hranidbenog lanca, ipak smo ugrožena vrsta. Jedino što nas spasava od naših prirodnih neprijatelja jesu političari i sveštenici.*

*Da njih nema, sistem bi nas odavno slomio,  
a đavo uzeo pod svoje. Tu nesebičnu misiju  
spasavanja preuzeli su na svoja pleća ne tražeći  
ništa zauzvrat. Jedini motiv im je bio vidjeti nas  
sretne i spasene. Na namaje da im vjerujemo i  
pružimo podršku, a sve ostalo, njihova je briga.*

*Neizmjerno im hvala što postoje..*

*Ne vjerujem u spasioce čovječanstva, ali najgore je  
što oni vjeruju u same sebe..*

*Biti duhovnjak ne znači biti duhovan, nego znati  
dobro teoretisati o duhovnosti..*

*Glava koja gleda stalno ispred sebe većinu vremena  
nema predstavu šta joj se dešava sa zadnjicom..*

*Vizuelno znači površno..*

*Ubijedi ljude da je nešto sveto i imaćeš gomilu  
sljedbenika koji nikad neće dovesti u pitanje  
ispravnost svog ubjedjenja..*

*Vjera u postojanje Boga je stvar srca, a vjera u njegovo nepostojanje je faktor uma. Simbioza ta dva centra nadilazi oba ova koncepta..*

*Religija je zatvor za pojedince aktivnog uma,  
a nauka im pruža samo privid slobode  
oslobađanjem iz njega..*

*Nauka i religija su dvije suprotstavljene krajnosti  
koje u osnovi počivaju na istom dogmatskom načelu,  
a to je slijepo uvjeravanje drugih u nepogrešivost  
vlastite doktrine..*

*Religija je sistem baziran na vjerovanju u svetu  
neophodnost postojanja istog..*

*Zašto mislim da je vrijeme vjerskih institucija  
prošlo? Zato što mislim da odraduju najpodmukliji  
posao one druge strane protiv koje se navodno bore,  
a da toga, na žalost sami nisu ni svjesni..*

*Bog religije je crkvena „verzija” apsoluta koju bi po  
njima svi trebali uzimati zdravo za gotovo..*



Tumaraju zvijeri kraj bedema pustih  
Na lancima onih što crnih su duše  
Bićem ih gone zidova tvorci  
Da prolaze traže, da kapije ruše..





*Ne vjerujem u ništa. Kad bih vjerovao,  
svojim umom bih negirao vlastiti doživljaj  
jedinstva sveg postojanja..*

*Ako ne vjerujem u postojanje Boga,  
a nisam ateist, šta sam onda ja?*

*Samo ono u šta duboko vjerujemo nismo u stanju  
podvrgnuti objektivnoj kritičkoj analizi..*

*Koje pravilo je opasnije? Ono koje propisuje  
da je određena stvar isključivo takva kako je  
definisana, ili ono nepisano u koje se vjeruje,  
da se ispravnost ovog prvog ni pod kojim uslovima  
ne treba dovoditi pod znak pitanja..*

*Biti, činiti, ili posjedovati? Pitanje je sad..*

*Čovjek čije su dobre osobine posuđene iz knjige  
ima samo jednu manu, čitav svoj život živi na dug,  
jer u vlasništvu još uvijek nema ništa svoje..*

*Žena na svom putu da prevaziđe sebe često sebe i  
izgubi, pa postane nešto sasvim drugo. To „drugo”  
najčešće nosi najgore muške osobine..*

*Raditi suprotno od onoga što ti drugi govore, ne znači raditi ispravno, ali isto tako ne znači raditi ni pogrešno. U svakom slučaju je manje pogrešno nego raditi ono što drugi misle da bi trebao, ma koliko rezultat radnje bio u tvom vlastitom interesu..*

*Užas i žrtve rata su blagost u poređenju sa nevidljivim dankom kojim se plaća kontrolisana utopija mira..*

*Ako podliježe zakonu vremena, ima i svoju uslovljenošć u prolaznosti..*

*Pružiti nekome odgovor ne piye vode, ako taj neko ne osjeća žeđ pitanja u svom grlu..*

*Šta to u nama hrani priroda svjesnih utisaka?*

*Bezuslovna ljubav, taj najveći ideal na ovom svijetu traži od tebe i najveću žrtvu koju na ovom svijetu možeš dati. Ta žrtva podrazumijeva žrtvovanje samog sebe, onog svog nepostojećeg, da bi onaj tvoj koji je tu, vječni, zasjao kroz nju još jače nego što to bez njega može sjati ona sama..*

*Šta te čini sretnim? Da imaš, da pripadaš, ili da jesi?*

*Konačni ishod transformacije pola je od jednog muškarca postati čovjek, a od žene, postati to isto..*

*Prava ljubav prema nekoj osobi podrazumijeva raditi sve ono što je u najboljem interesu te osobe, pa makar to prividno išlo i na tvoju vlastitu štetu..*

*Briga za nekoga iz ljubavi ne postoji. To je jedna vrsta emotivne sebičnosti koja nadvladava ljubav, a javlja se iz straha od gubitka onog nekog za koga misliš da ti po nekom pravilu pripada..*

*Prevario si me!? Meni nisi ništa loše uradio. Ukažao si mi na grešku, a koštala me je samo onoliko koliko ti misliš da si na dobitku zahvaljujući mojoj naivnosti. Na žalost, tebe će tvoj potez puno više stajati jer je potekao iz sebične namjere. A ni ta cijena neće biti previšoka za lekciju koju ćeš, ako budeš htio, biti u prilici da naučiš..*

*Ako još uvijek strahuješ, znači da nisi svoj objekat straha dovoljno dobro upoznao..*

*Najveću jezu stvara ono što očima ne primjećuješ, a čega si indirektno svjestan da postoji..*

*Ginuti u ratu ili trunuti u miru? Pitanje je sad..*

*Linearost je stvarnost posmatrana isključivo  
iz ugla linjskog kretanja subjekta..*

*Egoističan čovjek zamišlja Boga kao ideal samog  
sebe, ili u drugom slučaju odbacuje ga, jer je sam  
sebi nalik Bogu..*

*Poludjeti se može od straha, razboljeti od bijesa,  
ali potpuno zastraniti može se samo od mržnje..*

*On sebe zove realistom. Ja bi ga jednostavno nazvao  
slijepcem. Pitanje je ko je od nas dvojice u ovom  
slučaju „realniji“ u procjeni..*

*Naše ličnosti su na oprezu, ali ni jedno od nas dvoje  
ne može prikriti osjećaj ispunjenosti koje njegovo  
biće doživljava u blizini onog drugog, sebi sličnog..*

*Kako će nam izgledati tijela ako ikad svjesnošću  
uspijemo prevazići čovjeka? Ono što pojimam samo  
je djelić svega onog što je u stanju da pojmi mene..*

*Apstraktni um ne negira logiku, on je nadilazi..*

*Korijen moje volje niče iz želje koja je uslovljena  
logikom neočekivanog..*

*Gajim sumnju u namjere svega onog što je  
upravljen rukama drugih..*

*Ne znam šta me na ovom svijetu više plaši,  
dirigovani rat ili iskonstruisani mir..*

*Zlatom plaćaš, zlatom i kitiš, utiske koji vrijede  
sva blaga ovog svijeta..*

*Sve što je maleno još uvijek raste i jednog  
dana će biti veliko, a ono što je već veliko, i  
ono raste i bit će još veće..*

*Pred Bogom kleče oni koji još nisu dovoljno zreli  
da bi kleknuli pred same sebe..*

*Tražeći poveznice u svemu onom što pojimim,  
evolucija svijesti, odnosno njena individualna  
zrelost bi mogla biti krajnja životna svrha  
svakog pojedinca. Trenutno mi ni jedna druga  
ideja koja bi imala više smisla, a da je u vezi  
smisla ne pada na pamet..*

*Misli mogu biti simpleksne, kompleksne i multipleksne. Simpleksni i kompleksni um bi mogli pripadati nižem i višem logičkom umu, odnosno kad bi ih posmatrali kao dimenzije, prvoj i drugoj dimenziji razmišljanja. Simpleksni um bi u tom slučaju bio onaj pravolinijski, a kompleksni, um površine. Za razliku od njih um multipleksa bi mogao biti ono što nazivamo apstraktnim umom i odgovarala bi mu treća dimenzija razmišljanja, odnosno mjesto gdje se misli slobodno kreću, ali ne pravolinijski i površinski kao u slučaju prva dva uma, nego u nečemu što nalikuje trodimenzionalnom prostoru bez barijera. Ako znamo da je svaki ovaj um osnovni faktor percepcije određenog pojedinca, na osnovu toga možemo uvidjeti zašto svako od nas drugačije doživljava realnost koja ga okružuje, iako svi živimo okruženi potpuno istim svijetom..*

*Najljepše stvari nastaju iz nemira najvišeg zanosa..*

*Da sam znao danas, uradio bih to još juče. Da znam sutra, ne bih sutra ni čekao danas..*

*Što je moje, kod tebe troje  
Svako od nas za sebe svoj  
Za nas jedno, za druge droge  
Otac moj je i otac tvój..*



*Ozaren duh pušta suze pri doživljaju veličine.  
Suze tuge teku iz pogrešnih predstava..*

*Za onaj život koji činiš svaka smrt je zlata vrijedna..*

*Ono što ti ugađa čini te slabim..*

*Put ka objektivnom pruža se iz nespokoja  
vlastite subjektivnosti..*

*Težiti bilo čemu je nemoguće bez gladi utisaka  
onog što težnja predstavlja..*

*Tek kad vidim koliko sam daleko od savršenstva,  
motiv koji me gura ka njemu postaje mi utjeha..*

*Zašto osuđivati i nazivati nemoralnim ono što  
nikoga ne ugrožava?*

*Dobrota ne znači ispravnost. Dobrota je  
neiskvarenost duha i njen ekvivalent je bezbrižnost.  
Za razliku od nje ispravnost podrazumijeva razum i  
odgovornost. Dobrota čini samo dobar temelj za ono  
u šta bezbrižnost i prostodušnost trebaju izrasti..*

*Svi smo mi na neki način svjesni sebe, samo je pitanje u kojoj mjeri ta svjesnost ima udjela u našim životnim streljenjima..*

*Pravičnost kao osobina je dokaz zdravog razuma..*

*Kad strah neprimjetno preuzme kontrolu nad ličnošću i pomjeri je iz epicentra bića, ličnost dolazi u poziciju u kojoj više ne može pronaći težište u stvarnosti. Takva ličnost, odvojena od svoje suštine traži novi oslonac u imaginarnom i sve dublje potpada pod sile nesvjesnog. Krajnji stadijum takvog stanja naziva se ludilom..*

*Navika je mehanika nesvjesnog..*

*Inat je kralj svih gluposti..*

*Dva pitanja me muče vezana za vatrnu.  
Da li je ona produkt ili sila entropije i posjeduje li plamen svoju dimenziju?*

*Dok upireš prstom u drugog da bi istakao svoju veličinu u razlici, razlika postoji, ali ne ide u tvoju korist..*

*Strah upravlja impulsima. Impulsi diriguju ponašanjem. Ako ga se na vrijeme ne potisne vlastitom voljom, ponašanje zna preći u naviku..*

*Znati ili vjerovati? Pitanje je sad..*

*Vjerovanje pruža utjehu kad popuni nelagodnu prazninu onog što se ne zna..*

*Ubjedjenje je istovremeno i vjera u sigurnost i sigurnost u vjeru..*

*Količina vjere kod čovjeka je obrnuto proporcionalna njegovoј svjesnosti..*

*Kad razmišljaš o posljedici, razmisli prvo o smislu uzroka..*

*Ako su dobar i budala rođena braća, vrijedan i glup su isto..*

*Treba posjedovati dobru dozu lucidnosti da bi svijet gledao otvorenih očiju, a sačuvao zdravu pamet..*

*Postoji li vrijedan čovjek, ili je to onaj koji je u stanju sve uraditi samo da se ne bi morao suočiti sa vlastitim mislima..*

*Subjektivnost je individualna distorzija čistog toka svijesti..*

*Ko ne zna, taj se boji. Ko se boji, taj vjeruje..*

*Kad se prepozna različitost, važno je otkriti neophodnost njenog postojanja u jedinstvu svih stvari..*

*Lično, nije mi bliska ideja o Bogu. Daleko bliža mi je ideja o božanskom..*

*U suštini, svi ljudi su slobodni. Istinska sloboda je pravo izbora vlastite volje..*

*Čovjek ima sasvim dovoljno pameti ako sam može prepoznati situacije u kojima ispada jako glup..*

*Problem često izaziva burnu emotivnu reakciju, a do rješenja se dolazi isključivo „hladne” glave..*

*Nemoć koja pokušava ostvariti nadmoć, kao sredstvo koristi isključivo silu..*

*Sve što znam i ne znam, znam i ne znam isključivo za sebe..*

*Možda si pogrešan, a možda te samo ja doživljavam pogrešno jer imam pogrešnu predstavu o tebi..*

*Kidanje labavih veza sa vanjskim svijetom stvara neraskidivu vezu sa unutrašnjim..*

*Strah te ubija, ali strah te održava i budnim..*

*Kad ostavljaš trag na površini, trudi se da bude skriven. Svi vječni tragovi su neizbrisivi jer nisu vidljivi svakom oku, već samo onom koje za njima traga..*

*Dok te čini prividno jakim, mržnja ti uzima ogromnu snagu, tako da te brzo ostavi praznim iznutra. Ako je nastaviš gajiti, ubrzo ćeš snagu morati crpiti od drugih, jer prepuštanje njoj kida tvoju vezu sa izvorom..*

*Sa čime se poistovjećuješ, nisiš sa sobom  
i njegov mentalitet..*

*Objektivnost je neutralnost koja je u stanju  
dvije suprotstavljene strane sagledati u njihovom  
pravom svjetlu..*

*Jedni tragaju za svojim blagom, a drugi čekaju  
da dobiju ono što misle da su zaslužili..*

*Biti potpun, znači biti nevidljiv za sve gladne oči..*

*Dok ljude budeš gledao samo kao ljude,  
nećeš vidjeti ni miša, ni zmiju, ni vuka, ni sovu..*

*Vidiš sa čime te hrane, a ti jedeš samo da bi hranio  
njih dok ne postaneš isti kao i oni, prazan iznutra..*



*Suptilnost oka stoji volji na uvid  
Da prepozna tuđe kojih druge se boje  
I prkosи volja voljom svog duha  
A pod tuđom sve druge pogmute stoje..*





*Možda se pod pojmom vječnosti može podrazumijevati bezvremenost kao izuzeće vremena, ili vrijeme kao koncept koji je prevaziđen spoznajom o prividu njegovog linearног postojanja..*

*Stvarna sloboda se stiče rođenjem, a njena spoznaja životnim oslobođanjem iz okova nesvesnog..*

*Tok čiste svijesti ne poznaje doživljaj vjerskih zanosa, ali zato poznaje božanstveni osjećaj jedinstva sveg postojanja..*

*Pored toliko novih izraza danas je stvari sve teže nazvati njihovim pravim imenom..*

*Važno je imati vlastito mišljenje da bi ga mogao zadržati za sebe, dok tuda budeš dijelio sa drugima..*

*Od fokusa nečije pažnje prema njenom subjektu zavisi i kvalitet stvorene veze za kretanje energije u oba smjera..*

*Pruži ruku onom što korača iza tebe da bi onaj što ide ispred tebe, tebi pružio svoju..*

*Teorijsko znanje društvenog usmjerenja ima primjenu jedino unutar postojanog društvenog sistema. Kad sistem prestane funkcionisati to znanje postaje vrijedno isto koliko i papir sa potvrdom o njegovom sticanju..*

*Ako pokušaš buditi usnulog dok on sam ne poželi otvoriti oči, stvoriceš sebi neprijatelja..*

*Nemam još dovoljno snage da je savladam, za sada je samo više-manje uspješno držim pod kontrolom. Neko se možda i ponosi sa svojom, ali iskreno, ja se stidim životinje u sebi..*

*Znanje suštine je ekvivalent evoluciji svijesti i stiče se iskustvom, zapažanjem i vlastitim rasuđivanjem. Teorijsko znanje može poslužiti samo kao smjernica u kom se sve pravcu pojedinac može kretati na putu sticanja takvog znanja..*

*Za onog što misli da je centar svijeta, sve izvan tog centra djeluje nesavršeno..*

*O tebi ne govori puno ono što te ugrožava, koliko ono što činiš da mu se odupreš..*

*Obe strane ljudske prirode teže individualnosti, samo je drugačije manifestuju kad je dosegnu u određenoj mjeri. Jedna se doživljava superiorno i pokušava ubijediti druge u ispravnost njene vlastite individualne etike, dok druga prepozna važnost razvoja i očuvanja svake individue ponaosob, poštujući svaki korak ka njenom ostvarenju kao slobodni akt njene vlastite volje..*

*Kad stvari posmatraš iz ugla sebe, problem uvijek leži u drugima..*

*Mimikrija svjetla je produžetak ruke tame..*

*Razočarenja su najbolji pokazatelj kakvu zabludu u sebi kriju nerealna očekivanja..*

*Pričaj mi o današnjici, o padu kao šansi i značu da si čovjek sutrašnjeg dana..*

*Destrukcija je produkt kreativnosti entropije..*

*Ako stvaralaštvo drugih uspije probuditi stvaraoca u tebi, onda se ono s pravom može nazvati umjetnošću..*

*Momenat kada odrasteš nije onaj momenat kada stasaš, već kad se prvi put u životu nađeš licem u lice sa zlom pa ostaneš paralisan i poražen, bespomoćan da učiniš bilo šta da mu se odupreš.*

*Neki taj momenat nazivaju i buđenjem..*

*O danas kao o porazu pričaju samo jučerašnji i sutrašnji ljudi. Sutrašnji ljudi čine jedan mali procenat tog zbira..*

*Parametri su neophodni za definisanje, a svaka definicija je glavni ograničavajući faktor bezuslovnom razumijevanju..*

*Nadići logiku uma znači pobjijediti obrazac programa koji mu onemogućava razmišljanje izvan njime zadanih okvira..*

*Poraz je ono što te uči o besmislu pobjede..*

*Kako da joj se radujem, kad pobjeda nikad borbe nije vrijedna..*

*Okom dječije radoznalosti otvoriceš mi srce..*

*Daj mijednom i tražiću od tebe svaki put.  
Nauči me da stičem i biću ti vječno zahvalan  
na onome što si mi dao..*

*Puštaš li druge da utiske o tebi stiču bez  
upliva tvojih vlastitih impresija?*

*Ploveći rijekom života najveća je umjetnost slijediti  
onu struju koju stihija vode ne stvara svojim tokom..*

*Gоворити мудrostи пред свима ние одлика мудrostи,  
већ глупости егосентрика..*

*Ako je ћutanje zlato, учити се ћutanju је алхемијски  
процес претварања човека у њега..*

*Blago onom ко је успио пробудити срце надилазећи  
умом логику ума у објективности..*

*Политика је највећа илузија. Под појмом „Добар  
политичар” данас се подразумијева врхунски  
илузиониста који је у стању одрžавати илузiju  
изговорима уместо конкретних одговора на свако  
питање које му је постављено..*

*Filozofija je svaka umjetnost koja u svom aktu obuhvata načela životne suštine..*

*I ateizam je vjera. Taj termin ne označava nevjerovanje u postojanje Boga, već čvrsto vjerovanje u njegovo nepostojanje..*

*U ograničenom broju opcija nema one dobre, ima samo loših i onih malo boljih od njih..*

*Možeš li se stvarno osjećati zadovoljan slobodom izbora ako ti neko od bezbroj mogućnosti uvijek servira samo dvije?*

*Potcjenjivanje drugog je metod koji služi veličanju sebe u očima drugih, odnosno pokušaj da se kao oslonac vlastitog uzdizanja iskoriste nečija tuđa ramena..*

*Da bi se u životu održala ideologija jedne krajnosti, mora se stalno potencirati na besmislenosti alternative koja joj se nudi, a to obično bude ona koja joj je dijametralno suprotna..*



*Sivoj su brata doveli bijeli  
da crno i bijelo upozna kroz boje  
Smri se trude da ga privole sebi  
da crno bez boje prepozna ko svoje..*





*Iluzija slobode održava se prividom o mogućnosti izbora..*

*Da je kojim slučajem ljudima sa političkim ambicijama rad u interesu drugih isključiv motiv borbe za vlast, kod takvih bi se ličnosti nesebičnost ispoljavala kao glavna karakterna crta..*

*Podanik je rob na dobrovoljnoj bazi..*

*Radikalnost jedne ideje govori o karakteru sile koja iza nje стоји u pozadini..*

*Završne bitke se vode na tihom frontu..*

*Ljudi provedu većinu svog života ubjeđujući jedni druge u ispravnost onoga u šta ih je prethodno uspio ubijediti neko drugi..*

*Sila promjene utiče na sve potencijalne faktore za promjenu sa svrhom njihove aktivacije. Jednom aktiviran potencijal ne dovodi do prestanka djelovanja sile, već svojim razvojem polako zalazi na područje koje se nalazi izvan kruga njenog dejstva..*

*Ono što nije zahvaćeno vjetrom, to se ni ne povija..*

*Otpor je pokazatelj snage duha, a proizvod je njegove slabosti..*

*Dok služiš sebe, sluga si drugome. Dok služiš druge, sluga si sebi..*

*Kroz onakvog kakav mi se predstavljaš,  
vidim te onakvog kakav jesi..*

*Zmija u njedrima je priroda vuka. Mudrost vuka je zmija u glavi..*

*Ako razmišљaš kao crv, crv u tebi će se opirati  
kad god smatra da je ugrožen..*

*Dok god misliš da jesi, nisi. Ako ne misliš da jesi,  
onda možda i bude nešto od tebe..*

*Čovjek koji se bori sam sa sobom djeluje nejako  
u očima onih koji borbu vode samo sa drugima..*

*Od miševa što umislile da su lavovi  
ostaše jedino zmije..*

*Vanjskog neprijatelja stvara onaj unutrašnji.  
Bez obzira na ishod bitke sa vanjskim, unutrašnji  
neprijatelj uvijek pobjeđuje..*

*Za tebe mislim da si zrno, a za sebe da sam  
planina. Ti to isto misliš za mene. A obojica smo  
zrna, a i planine, ali kako to da znamo? Zato i jesmo  
samo zrna što misle da su planine..*

*Superlativ nadvrijednosti nosi sa sobom  
parazitske osobine..*

*Svaki sistem vrijednosti ima svoju hijerarhiju.  
Unutar svake hijerarhije niži i viši rangovi zavise od  
posjeda one vrijednosti na kojoj se temelji sistem.  
Usvajanje pravila tog sistema od strane pojedinca  
podrazumijeva identifikovanje sa vrijednošću  
koju propisuje sistem i prihvatanje ranga koji mu  
sistem dodijeli na osnovu njegove vlastite procjene.  
Unutar svakog hijerarhijskog sistema pravilo je  
da se vrijednošću niže rangirani uvijek potčinjava  
onom višem. Razlika između sistema je samo u  
tome šta je odabранo za vrijednost na kojoj će svaki  
pojedinačno graditi svoj temelj..*

*Ljudsko je sve ono što pripada čovjeku. I ono što je božansko i ono animalno. Čovjek nije ni jedno od to dvoje ako je oboje istovremeno. Preovladava ono sa čim se njegova priroda vremenom poistovjeti..*

*Čovjekovo nesvjesno je njegov Trojanski konj.  
Onoliko koliko ga je svjestan kao prijetnje,  
toliko će biti u mogućnosti paziti šta preko  
njega pušta unutra..*

*Ispodprosječnost jednog segmenta, često se javlja  
kao posljedica natprosječnosti drugog i obratno..*

*Srce se ne gubi prepoznavanjem razlika, već  
upornim insistiranjem na isticanju njihove važnosti..*

*Identifikovanje sebe ne dostiže se putem  
poistovjećivanja sa onim što jesi, već putem  
prepoznavanja onog što nisi..*

*Kad upoznaš prirodu svog opozita, upoznat ćeš sa  
njom i njenu suprotnost..*

*Snaga noći ne počiva na mraku, već na lažnom  
svjetlu koje mu je snagom adekvantno..*

*Svaka sila vremenom nailazi na otpor istovjetne sile  
upravljene u suprotnom smjeru..*

*Niko svog pravog neprijatelja nije upoznao do  
posljednjeg slova..*

*Oči su sljepе na dokaze koji ne idu u prilog stavu  
formiranom na osnovu predubjedenja..*

*Tamo gdje se ne vlada savješću, vlada se silom..*

*Kad se poruke najviše vrijednosti prenose jezikom  
simpleksa, kompleksnom umu one zvuče banalno..*

*Suština smisla života je za života prepoznati  
smisao njegove suštine..*

*Mali uvidi u znanja često odnose prevagu u važnosti  
i osjećaju posebnosti onih koji su ih spoznali..*

*Smisao za kojim tragaš javlja ti se u vidu senzacija  
kad se nađeš na pravom putu njegovog otkrića..*

*Za iskrenog tragaoca mrvice na putu su blaga  
neprocjenjive vrijednosti..*

*Možda nije moje da shvatim, ali je svakako moje da to isto pokušam..*

*U kojoj mjeri smo stvarno ograničeni prostorno - vremenskim barijerama, a u kojoj su te barijere samo rezultat našeg ograničenog poimanja ta dva koncepta?*

*Šta to znači postati savršen? Da li to znači prevazići ideal čovjeka ili postati upravo ono što taj ideal u svom najboljem izdanju i predstavlja?*

*Vjerovanje gradi kule od pijeska na mjestima gdje je predviđeno da stoje čvrsti temelji..*

*Kad shvatiš da si nepovrediv, srušiće se ispred tebe i posljednji zid..*

*Bezgraničnost? Otvorenost za mogućnost postojanja svake mogućnosti..*

*Sa Alefom u oku ni srce ne može biti crna rupa..*

*Oste glave dva su oka  
svako svoju stazu gleda  
Vadi rukā dva razroka  
da ih stazi svojoj predā..*





*Svijet je predstava kojoj se ne pozna scenario,  
a ni režiser. Pogledaj se u ogledalo ne bi li bar  
prepoznao najvećeg glumca u njoj..*

*Iskorak je pedalj koji praviš u stranu, u odnosu  
na kilometre kojima pokušavaš napredovati  
pravolinijijski..*

*Da li je svijest ono što se naziva dušom ili je  
svijest samo esencija duše, kod svake individue  
u različitoj fazi razvoja?*

*Smrt se može posmatrati i kao jedini način izlaska  
iz ove fizikalne realnosti, kad tijelo, odnosno  
instrument koji omogućava održavanje svijesti u  
njoj iz određenog razloga prestane vršiti tu svoju  
funkciju za koju je prвobитно bilo i namjenjeno..*

*Nadzor i kontrola su neophodni samo pri poticanju  
i usmjeravanju. Kad objekat kontrole dostigne  
zrelost, vlastitom samokontrolom mora nadići  
potrebu za uslovljenošću tuđeg nadzora..*

*Rad stvara otpor kad je iz obaveze i ispunjenje kad  
je produkt lične odgovornosti..*

*I kad praviš pakost i kad radiš dobro djelo, sve to  
činiš radi vlastitog osjećaja zadovoljstva..*

*Lucidnost sanjara budi odgovornost za one usnule..*

*Sve što stičeš ima svoju cijenu. Svaka vrlina uzima  
svoj danak..*

*Ubjedljivanje je pogrešno jer polazi od osnove koja u  
startu pokušava silom nametati svoju volju..*

*Mišljenje je konstrukcija misli sazdana od onog  
što znamo i onog što pretpostavljamo. Ako se  
ispostavi da su pretpostavke bile pogrešne, tad i  
mišljenje postaje sklono promjeni..*

*I matematički možemo izraziti suštinu.  
Osnova i princip su jedan, jedan je prisutan  
u svim brojevima..*

*Položaj podanika i kralja je isti, oba stoje  
pod tuđim krunama..*

*I dobro i зло postaju svjesni tek kad počnu  
učiti na vlastitim greškama..*

*Dok vode prirodni tok evolucije u pogrešnom smjeru, sile entropije se nadaju da će stvoriti temelj koji će im povećati brojno stanje. U kojoj mjeri uspješno ostvare tu svoju namjeru u tolikoj mjeri i same evoluiraju u tom procesu..*

*Pravilno usmjeren interes prema sebi sav svoj napredak ostvaruje na tudioj naivnosti..*

*Kosmos, Svetmir, Univerzum..  
Ko smo ti i ja? Same riječi ti kažu. Samo dah sveopštег mira u stihovima jedne pjesme..*

*Jedino je čovjek usnulog duha u stanju braniti sebe po cijenu svog života..*

*Čovjekova ličnost koja svoj oslonac pronalazi u tijelu pribavlja se fizičke smrti jer zna da smrću tijela umire i ona sama..*

*Za našu grešku očekuje nas isto djelo. Za tebe je to kazna. Za mene je to podsticaj..*

*Ne treba mi veći motiv da tragam, duša mi je vječno gladna ljepote..*

*Težiš savršenstvu, a žena posjeduje nešto od onoga čemu težiš. Tek upoznajući nju počinješ shvatati koliko si ti od njega daleko..*

*Od velikog zla vani uvijek je veće ono najmanje iznutra..*

*Velike misli su najbolji inicijatori malih misli o sebi..*

*Ono što je za ovu Bog, čovjeku je samo pastir.  
Ono što je za čovjeka Bog, Bogu je samo pastir..*

*Ako je moja ličnost onaj dio mene koji često ima običaj da se umjesto mene identificira i predstavlja samo sa sobom, šta sam onda ja?*

*Ono što se u pojedinim situacijama pokazuje kao tvoj najveći zaštitnik, kad se osjeti ugroženim postaje tvoj najveći neprijatelj..*

*Kad sistem nije u mogućnosti da nešto prilagodi svojoj distorziji, to nešto se od strane njega ili napada ili jednostavno ignoriše..*

*Kolektivnu svijest čine sve individualne, a svaka od njih samo u onoj sferi u kojoj pravi kompromis sa društveno prihvatljivim normama..*

*Sloboda je privilegija osvajača čistog toka svijesti..*

*Ako je rob vlasništvo svog gospodara, u čijem je vlasništvu onaj koji robuje prividu slobode?*

*Svako vrijeme ima svoju dominantnu ideologiju.*

*Svaki društveni usud koji izrasta unutar nje, stabljika je koja počiva na korijenu njenog morala..*

*Jednom kada osjetiš ukus stvarnosti, nećeš se poslje moći zasiliti ničim manjim..*

*Sliku iz glave koja se prenosi riječima prepoznaće samo onaj koji posjeduje istu takvu sliku, a za koju nije mogao pronaći riječi koje bi je opisale..*

*Distanca je razlika u daljinu. Prirodno se javlja i među ljudima zbog razlike u daljini do koje dopire pogled svakog od njih pojedinačno..*

*Nemir je odraz bitke kojoj ste svjedoci samo  
ti i tvoj neprijatelj..*

*Tuga bez suza je veo onog vođenog  
čežnjom svog duha..*

*Kad um zaroni u srce, iz srca izranja  
okupan dubinom..*

*Mir je kruna svih tvojih ratova..*

*Pokušavam da doprem do tebe, ali ego je  
kanjon od hiljadu kilometara, a ti stojiš na drugoj  
strani. Kroz njega od tvojih vapaja ostaje samo echo..*

*Kako da budemo prijatelji kad se svaki kontakt  
između nas odvija preko neprijatelja koje smo  
postavili da razgovaraju u naše ime..*

*Logika srca je logici uma nerazumljiva..*

*Ako smo svi oči i uši tvorca, šta je to što nas svakog  
ponaosob čini individualnim posmatračem?*



*SVAKI svojoj čežnji stiže,  
Nemir dnu kroz dubinu  
Mir ljetoti kroz vrlinu..*





*Kreativni ljudi drugima čine stvarnost malo manje nestvarnom i time lakše podnošljivom..*

*Maštovitost je osobina one svijesti koja korača izvan područja usudom ograničenih mogućnosti..*

*Ono što započinje tačkom vjerovatnih uzroka,  
a prostire se teritorijom mogućih ishoda,  
naziva se makrokosmos..*

*Kad bi svijet bio škola zrelosti, ovaj život bi bio  
samo jedan razred u njoj..*

*Djetinstvo je jedina oaza koja pruža uživanje  
u bezbrižnosti naivnosti prije stasavanja za odlazak  
na put kroz pustinju..*

*Dodoh sebi  
Vidjeh sebe  
Pobijedih se..*

*Ljubav je paradoks. Iz ljubavi jednog nastaje dvoje.  
U ljubavi dvoje stvaraju jedno..*

*Misao je kreacija, sve druge forme su samo simboli koji je prenose..*

*Vrijednost stvorenog nije samo njegova sposobnost motivacije drugih da stvaraju, već i jačina iste te sposobnosti oslikane u onom stvorenom od strane motivisanih..*

*Ono što je ključ katancu srca, to je umu preskočeni zid..*

*Zakon se ispoljava u kretanju. Postoji različit intenzitet djelovanja na tačke u pokretu. Jak za one koje idu pravom linijom. Nešto slabiji za one koje se kreću unutar kruga. A rijedak i po potrebi različitog intenziteta za one koje se kreću dužinom spirale..*

*Opasnost za sanjare je egotrip. Ludnice su pune onih koji su sebe počeli shvatati suviše ozbiljno..*

*Na vrhu svijeta sjedi pastir. Ne postoji kralj slobodnih ljudi..*

*Fatalizam je posljedica dobre percepcije uma, ali loše koordinacije sa unutrašnjim okom..*

*Razlike postaju trivijalna stvar u poređenju sa doživljajem jedinstva koji pruža svaka spoznana relativnost..*

*Crveno sumnje je motiv strahu i izgovor volji da okuje samu sebe..*

*Lanci kojima si zarobljen omotani su oko srca..*

*Strah je iluzija jer se temelji samo na pretpostavci onog mogućeg, a potencijalno štetnog..*

*Čovjek u okovima nije rob. Okovi roba su u njegovoj glavi..*

*Ako je sloboda stanje duha, ropstvo se može tumačiti kao poistovjećivanje sa onim što podliježe nečijem vlasništvu..*

*Sama riječ kaže, svi što jesu i sve što jest, kao pojam o svima i pojam o svemu, svijest..*

*Pitanje je put. Odgovor je trenutak kada zastaneš..*

*Uvijek je bilo, što hrana za ego, to otrov za dušu..*

*Šta te više inspiriše, potvrda ili nagovještaj?*

*Prepoznajem opasnost u novim trendovima koji se provlače kroz pore društva i preko noći postaju opšteprihvaćen fenomen. Opasnije od njih samih je jednoumlje kolektiva sa svojim nekritičkim prihvatanjem ideologija kojima su trendovi prožeti. Ni jedan trend koji je došao sa one strane Atlantika nije donio ništa dobro. Poslije svakog talasa postajemo malo manje svoji, a u konačnici najviše žrtava prebrojava individualni ljudski duh..*

*Vremena su varljiva. Ne treba gubiti iz vida ono svoje, čak i kad sam ne budeš svoj..*

*Tamo gdje prestaje kritika ne počinje saglasnost, već razumijevanje..*

*Kako poraziti besmrtnog? Pa tako što ćeš ga ubijediti da on to nije..*

*Ironično je što svaka borba za slobodu oslobođa samo životinju u čovjeku, a nikad čovjeka od nje..*

*Propagirana sloboda je za naivne mamac  
ropstva na kvadrat..*

*Univerzum se jednako oslikava i u onom što  
stvara život i u onom što ga ugrožava..*

*Ako ja sebe gledam kao jedan, i ti sebe gledaš kao  
jedan, zašto onda jedan drugoga gledamo kao dva?*

*Kritičar je onaj koji uočava nepravilnost, nemajući  
još uvijek dovoljno razumijevanja za uočeno..*

*Cjelovitost je prepoznavanje božanstvenosti u  
pojavnom kad se posmatra iz težišta sebe kao cjeline..*

*Beskonačnost se neće dostići traženjem  
konačnih odgovora..*

*Odrednica ljudskom umu na njegovom putu  
do slobode je čovjekova prirodna težnja ka  
univerzalnosti. Znak napredovanja na tom putu  
je prepoznavanje relativnosti svakog zaokruženog  
pojma koji ga u tome spriječava..*

*Ćutanje nije znak da nema šta da se kaže, već je  
znak da ono što se ima za reći nije namijenjeno  
ušima onih što pričaju..*

*Tiki ljudi su kao obimne knjige, većini drugih  
ljudi prilično nezanimljivog sadržaja..*

*Čije uslovavljanje sam prihvatio da sam sebi  
postanem glavni faktor svog ograničenja?*

*Univerzalizam je zakon jednine..*

*Misliti da jesи i biti, razlika je izmeđу  
nepostojanja i bitka..*

*Plaši me praznina onih čija je realnost  
logikom objasnjava..*



*Koliko je još godina potrebno preći  
jedan otkucaj srca da stane  
Kad su noge umorne i ne mogu idti  
a i tijelo želi tu da ostane?*





*Besmrtan nije onaj koji ne umire, već onaj koji zna  
pravi razlog zašto u životu više ne živi..*

*Nekadašnji mitski pogled na svijet danas smo  
zamijenili logičkim rasuđivanjem. Da li je to znak  
da smo u međuvremenu sazreli i odrasli ili da je  
možda nešto s vremenom umrlo u nama?*

*Stvarna bogatstva čuvaju se tišinom..*

*Vrata stvarnosti su uvijek otvorena. Iluzija postavlja  
zamke onima koji im se približe suviše blizu..*

*Što racionalnom umu govori logika,  
to iracionalnom umu govore utisci..*

*Ko druge vidi kao slijepce i sam gleda  
samo na jedno oko..*

*Ne marim za narod koji ne poznaje ljude,  
niti me briga za ljude koji nisu čuli za čovjeka..*

*Površni ljudi vide đavola u svemu, osim u onom  
gdje ga najviše ima..*

*Što je jedna ideologija duže prisutna među ljudima, to će imati i dublje korjene pa će samim tim i duže odolijevati pod teretom dokaza koji joj ne govore u prilog..*

*Svaka ideološka tvorevina produkt je sljepila racionalnog uma..*

*Ja samo živim realnost onog što sviješću mogu da pojmem, ništa ni više, ni manje od toga..*

*Ako si brat, a brat si, kad upoznaš svoju sestru preko nje ćeš upoznati i oca..*

*Maska učitosti krije lik stranca..*

*Očima gledaš ljude, ljudskost prepoznaješ srcem..*

*Otac mi je jedan, braća su mi svi..*

*Muškarac i žena su zahvaljujući očiglednim razlikama u potencijalu svojih bioloških formi upravo jedno drugom i savršeni katalizatori za njihovo prevazilaženje..*

*Prava hrabrost je odvažnost duha koji se hvata u koštač sa zvjerstvom svojih unutrašnjih neprijatelja..*

*Realisti me zovu idealistom. Ja jesam idealista. Moj idealizam je za mene realizam. Nisam ja kriv što u njihovoј realnosti on nije ostvariv..*

*Percepcija je prilagodiva očima željenog..*

*Optimistično vjerovanje u bolje sutra radja nadu i postaje motiv istrajnosti u teškim vremenima, ali nas čini i pasivnim prema postupcima koje bi svaki od nas trebao uraditi da bi to bolje sutra stvarno i došlo..*

*Jagnje prestaje biti jagnje kad dobro upozna sebe i vuka..*

*Ovaj svijet je teatar niskih strasti, jeftine glume i varljivih utisaka. U poređenju sa pravim pozorištem njegova pojavnost je iluzorna isto kao i predstava koja se odigrava na pozornici. Dok predstava traje, realnost svijeta odvija se iza kulisa..*





## EP1LOG:



*O onom što dolazi..*

*R*eligija je odradila svoju istorijsku ulogu koja joj je povjerena i sad štafetu predaje nauci. Vjerovanje u postojanje Boga sad se mijenja sa vjerovanjem u njegovo nepostojanje. Krvava istorija koja nas je dovela u ovaj vijek čuda najbolji je dokaz u kom pravcu vode sve ideologije krajnosti, tako da ni od ove nove ne možemo očekivati ništa više od, u najboljem slučaju nastavka tamo gdje je stala ona stara.

*O vrijednostima..*

*V*jerovatno postoji nekakav kosmički usud, nekakav princip po kome se stvari odvijaju i pravo je pitanje mogu li one i biti drugačije nego što jesu. Ono za šta se mi zalažemo u ovoj kakofoniji struja i raznoraznih uticaja jedino definiše nas same.

*Za nadati se da će onaj svjesni impuls u nama prepoznati individualni pravac svakog od nas ponaosob, put kojim bi se trebali kretati kako na lično, tako i na opšte dobro. Napredak koji donosi nadgradnja sebe nije mjeriv današnjim aršinima kojima se mjeri uspjeh ove nove društvene aristokratije, ali bogatstvo čovjeka se uvijek i mjerilo onim što se posjeduje ili misli da se posjeduje. Vrijednost takvih dobara je ono što je stvar kolektivnih, društvenih ili pojedinačnih interpretacija mjerila vrijednosti. Tako da se zaključak i svodi na to da je bogatstva neophodno sakupljati, ali svako od nas, naravno samo ona koja on smatra vrijednim. Svima nama je stalo da budemo ispunjeni, bogati ili cijenjeni, samo je pitanje od koga ili čega. To je suština u kojoj se razlikujemo, a i u ovom slučaju vrijednosti se prikazuju kao ono što one jedino i mogu biti i ono što one u suštini i jesu, relativne..*

.....→(C)O(O)C←.....

*Odgovor mi dadoše i godine i put  
Ža sudbinu što osta izvan domaćaja ruku  
Da su zvijezde pravi dom ovog duha slobode  
Što mu zemlja sad sahranjuje gorčinu i muku..*

.....→(C)O(O)C←.....



---

*Branislav Gašić*  
*PUTNIKOVA PJESMA*

---

*Izdavač:*  
*Art print, Banja Luka*

*Za izdavača:*  
*Milan Stijak*

*Lektor:*  
*Nina Kujača*

*Priprema za štampu:*  
*Vedran Čičić*

*Štampa:*  
*Art print, Banja Luka*

*Tiraž:*  
*200 primjeraka*

CIP: